

## Georgo Dandin: komedio en tri aktoj

Esperantista Centra Librejo

Paris; FRA 1930

Barcode: +Z103879602

Umfang: Bild 1 - 68

---

### Nutzungsbedingungen

Die Österreichische Nationalbibliothek macht an diesen Inhalten kein eigenes urheberrechtliches Verwertungsrecht geltend. Sie erklärt sich insofern auch mit einer Nachnutzung dieser Inhalte in der abrufbaren Qualität ausdrücklich einverstanden. Dies gilt auch für die Verwendung dieser Inhalte in Online-Foren, Blogs und in Social-Media-Kanälen wie Facebook, Instagram, Pinterest etc.. Unabhängig davon sind allenfalls bestehende Rechte Dritter an den Inhalten vor jeglicher Nachnutzung vom Verwender individuell zu klären.

Bei einer Nutzung unserer Inhalte ersuchen wir um die Angabe eines Bildnachweises (Titel, Datierung und weitere verfügbare Beschreibungen) und um eine Quellenangabe (Zitierlink aus [Portal] und der Verweis "[Portal]/Österreichische Nationalbibliothek"). Für Postings auf Facebook oder Instagram ersuchen wir um Verlinkung des entsprechenden Accounts der Österreichischen Nationalbibliothek.



ÖSTERREICHISCHE  
NATIONALBIBLIOTHEK

701.583-B

ESP 3. eld.











ÖNB



+Z103879602







2,2



MOLIÈRE

---

# GEORGO DANDIN

Komedio en tri aktoj

EL LA FRANCA LINGVO TRADUKIS

D<sup>ro</sup> L. L. ZAMENHOFF

---

TRIA ELDONO

---

PARIS

ESPERANTISTA CENTRA LIBREJO

51, Rue de Clichy (9<sup>e</sup>)



***Verkaro de D<sup>ro</sup> L. L. Zamenhof :***

***Fundamentaj Verkoj.***

**Fundamento de Esperanto.** Antaŭparolo, Gramatiko, Ekzercaro, Universala Vortaro.

Eldono kvinlingva (franca-angla-germana-rusa-pola).

Unu volumo in-16, xi + 184-paĝa. . . . . Francaj fr. 6 »

Eldonoj en lingvoj : bohema, greka, hungara, itala, rumana. Ĉiu eldono.

Unu volumo in-16. . . . . 3 »

**Lingvaj Respondoj (Plena Kolekto).**

Unu volumo in-8, 94-paĝa, sur malpeza papero . . . . . 6 »

— sur peza papero. . . . . 8 »

**Fundamenta Krestomatio.** Ekzercoj, Fabeloj kaj Rakontoj, Artikoloj pri Esperanto, Poezioj.

Unu volumo in-16, 460-paĝa . . . . . 15 »

**Aldono al la « Dua Libro de l' Lingvo Internacia », de D<sup>ro</sup> Esperanto.**

Fotografia reprodukto laŭ la originala eldono de H. KILTER en Varsovio, 1889.

Unu volumo in-8, 20-paĝa . . . . . 2 »

***Tradukoj.***

**Fabeloj de Andersen.**

Unua volumo in-8, 152-paĝa. . . . . 9 »

Dua volumo in-8, 152-paĝa . . . . . 9 »

Tria volumo, en *preparo* . . . . . » »

**Georgo Dandin,** komedio en tri aktoj, de MOLIERE.

Unu volumo in-8, 52-paĝa. . . . . 4 »

**Hamleto,** tragedio en kvin aktoj, de SHAKESPEARE.

Unu volumo in-16, 170-paĝa. . . . . 6 »

**Ifigenio en Taŭrido,** dramo en kvin aktoj, de GOETHE.

Unu volumo in-8, 108-paĝa, sur malpeza papero . . . . . 7 50

— sur peza papero . . . . . 12 50

**La Batalo de l' Vivo,** de Ch. DICKENS.

Unu volumo in-8, 68-paĝa. . . . . 10 »

**La Rabeno de Baharah,** de HEINE; **La Gimnazio,** de ŠALOM ALEJHEM.

Unu volumo in-8, 68-paĝa, sur malpeza papero . . . . . 5 »

**La Rabistoj,** dramo en kvin aktoj, de SCHILLER.

Unu volumo in-8, 144-paĝa, sur malpeza papero . . . . . 9 »

— sur peza papero . . . . . 15 »

**La Revizoro,** komedio en kvin aktoj, de N.-V. GOGOL.

Unu volumo in-8, 100-paĝa, sur malpeza papero . . . . . 7 50

— sur peza papero . . . . . 12 50

**Marta,** rakonto, de ELIZA ORZESZKO.

Unu volumo in-8, 237-paĝa, sur malpeza papero. . . . . 15 »

— sur peza papero. . . . . 25 »

**Proverbaro Esperanta,** laŭ la verko « Frazologio rusa-pola-franca-germana », de M. F. ZAMENHOF (1232 proverboj).

Unu volumo in-8, 82-paĝa. . . . . 7 50

***El « La Biblio ».***

**La Predikanto,** libro el « La Poetika Libraro ».

Unu volumo in-8, 28-paĝa. . . . . 1 »

La supraj prezoj povas varii, nur tiuj anoncitaj en la **Plena Katalogo de la Esperantista Centra Librejo**, estas ĉiam oficialaj.

Oni aldonu la sendokostojn al la supre anoncitaj prezoj.



GEORGO DANDIN

21 Nov 1958









MOLIÈRE

---

# GEORGO DANDIN

Komedio en tri aktoj

EL LA FRANCA LINGVO TRADUKIS

D<sup>ro</sup> L. L. ZAMENHOF

3. ———  
TRIA ELDONO  
—————

PARIS  
ESPERANTISTA CENTRA LIBREJO  
51, Rue de Clichy (9<sup>e</sup>)

1930

Tous droits réservés = Represo malpermesata.

701.583-B.Esp.  
2,2  
3. Aufl.



Molière, (Jean + Baptiste Poquelin dit)  
George Dandin

## PERSONOJ

---

GEORGO DANDIN (Dandèn), riĉa kampulo, edzo de Angeliko.

ANGELIKO, edzino de Georgo Dandin kaj filino de S<sup>ro</sup> de Sotenville.

S<sup>ro</sup> de SOTENVILLE (Sotanvil) kampara nobelo, patro de Angeliko.

Sino de SOTENVILLE.

KLITANDRO, amanto de Angeliko.

KLAŬDINO, servantino de Angeliko.

LUBIN (Lübèn), kampulo, servanto de Klitandro.

COLIN (Kolèn), servisto de Georgo Dandin.

La loko de agado estas antaŭ la domo de Georgo Dandin, en la kamparo.



# GEORGO DANDIN

---

## AKTO UNUA

---

### SCENO UNUA.

GEORGO DANDIN, *sola.*

Ha, nobela edzino estas malbona afero! kaj mia edziĝo estas instrua leciono por ĉiuj kampuloj, kiuj volas leviĝi super sian staton kaj edzoliĝi kun domo de nobelo, kiel mi faris! La nobel-eco per si mem estas bona; ĝi estas io valora, tute certe; sed ĝi estas ligita kun tiom da malbonaj cirkonstancoj, ke estas tre bone lasi ĝin flanke. Pri tio mi fariĝis saĝa per mia propra kostopago, kaj mi scias, kiel nin traktas la nobeloj, kiam ili nin ne-nobelojn akceptas en sian familion. La ligiĝo, kiun ili faras, estas tre malgranda rilate nian personon; sole kun nia havo ili edziĝas; kaj kiel ajn riĉa mi estas, mi farus pli bone, se mi edziĝus kun senartifika kaj bona kampulino, anstataŭ preni edzinon, kiu tenas sin pli alte ol mi, vidas ofendon por si en tio, ke ŝi portas mian nomon, kaj pensas, ke per mia tuta riĉeco mi ne sufiĉe pagis por la honoro esti ŝia edzo. Georgo Dandin, Georgo Dandin! vi faris malsaĝaĵon la plej grandan en la mondo. Mia domo estas nun por mi io terura, kaj ĉiufoje, kiam mi eniras en ĝin, mi nepre trovas tie ian ĉagrenon.



## SCENO DUA.

GEORGO DANDIN, LUBIN.

GEORGO DANDIN, *al si mem, vidante, ke Lubin eliras el lia domo.* — Kion, al la diablo, tiu sentaŭgulo faris ĉe mi?

LUBIN, *al si mem, rimarkante Georgon Dandin.* — Jen ia homo min observas!

GEORGO DANDIN, *al si mem.* — Li min ne konas.

LUBIN, *al si mem.* — Li ion suspektas.

GEORGO DANDIN, *al si mem.* — Ha, li forte sin ĝenas saluti.

LUBIN, *al si mem.* — Mi timas, ke li ne rakontu al iu, ke li vidis min elirantan el tie.

GEORGO DANDIN. — Bonan tagon!

LUBIN. — Via servanto!

GEORGO DANDIN. — Vi ne estas de ĉi tie, al mi ŝajnas?

LUBIN. — Ne, mi venis ĉi tien nur por vidi la morgaŭan feston.

GEORGO DANDIN. — Efektive? diru, mi petas, vi venas de tie el la domo?

LUBIN. — Ts!

GEORGO DANDIN. — Kio?

LUBIN. — Silentu!

GEORGO DANDIN. — Kio do estas?

LUBIN. — He, nu! Vi ne devas diri, ke vi vidis min elirantan el tie.

GEORGO DANDIN. — Kial?


LUBIN. — Mia Dio! ĉar....

GEORGO DANDIN. — Kial do?

LUBIN. — Mallaŭte! mi timas, ke oni nin aŭskultas.

GEORGO DANDIN. — Tute ne, tute ne!

LUBIN. — Mi ĵus parolis kun la mastrino de la loĝejo, en komisio de unu sinjoro, kiu faras al ŝi amajn okuletojn; kaj estas necese, ke oni tion ne sciu. Vi komprenas?





GEORGO DANDIN. — Jes.

LUBIN. — Tio estas la kaŭzo. Oni severe ordonis al mi, ke mi min gardu, ke neniu min vidu; tial mi petas vin, ne diru, ke vi min vidis.

GEORGO DANDIN. — Mi min gardos.

LUBIN. — Mi tre volas fari la aferojn sekrete, kiel oni rekomendis al mi.

GEORGO DANDIN. — Tre prave.

LUBIN. — La edzo, kiel oni diras, estas ĵaluzulo, kiu ne volas, ke oni ludu amon kun lia edzino, kaj li diable furiozus, se io simila venus al liaj oreloj. Vi komprenas?

GEORGO DANDIN. — Tre bone.

LUBIN. — Estas necese, ke li nenion sciu pri tio.

GEORGO DANDIN. — Sendube.

LUBIN. — Oni volas trompi lin tute silente. Vi komprenas?

GEORGO DANDIN. — Plej perfekte.

LUBIN. — Se vi dirus, ke vi vidis min elirantan el lia domo, vi malbonigus la tutan aferon. Vi komprenas?

GEORGO DANDIN. — Certe! Kaj kia estas la nomo de tiu, kiu vin sendis tien?

LUBIN. — Ĝi estas la sinjoro de nia loko, sinjoro vicgrafo de....

Pesto! mi neniam memoras, kiel, al la diablo, oni elparolaĉas tiun nomon; sinjoro Kli... Klitandro.

GEORGO DANDIN. — Ĉu ĝi estas tiu juna kortegano, kiu loĝas....

LUBIN. — Jes, apud tiuj arboj.

GEORGO DANDIN, *al si mem.* — Ha, tio estas la kaŭzo, ke antaŭ ne longe tiu sinjoreto prenis loĝejon kontraŭe de mi! Videble mi havis bonan nazon, kaj lia najbareco tuj estis por mi suspekta.

LUBIN. — Vorton de honoro! li estas la plej honesta homo, kiun oni iam vidis. Li donis al mi tri orajn monerojn, por ke mi nur iru diri al la virino, ke li ŝin amas, kaj ke li tre dezirus havi la ho-



noron paroli kun ŝi. Nu, diru, ĉu ĝi estas granda laboro, por ke li devu pagi al mi tiel bone? kaj kio estas, en komparo kun tio, tuta tago da laborado, kiu donas al mi ne pli ol dek soldojn!

GEORGO DANDIN. — Nu, ĉu vi plenumis vian komision?

LUBIN. — Jes; mi trovis tie iun Klaŭdinon, kiu tuj en la unua momento komprenis, kion mi volas, kaj enkondukis min al sia mastrino.

GEORGO DANDIN, *al si mem.* — Ha, fripona servantino!

LUBIN. — Al la diablo! Tiu Klaŭdino estas tute bela; ŝi akiris mian amon, kaj ĝi nur dependos de ŝi, ke ni fariĝu geedzoj.

GEORGO DANDIN. — Sed kian respondon donis la mastrino al tiu sinjoro kortegulo?

LUBIN. — Ŝi ordonis, ke mi diru al li.... Atendu, mi ne scias, ĉu mi bone memoras ĉion ĉi tion.... Ŝi diris, ke ŝi estas al li tre danka por la amo, kiun li havas por ŝi; sed pro ŝia edzo, kiu estas stranga homo, li sin gardu, ke oni tion ne rimarku; kaj ke oni devos peni trovi ian rimedon, ke ili povu ambaŭ paroli inter si.

GEORGO DANDIN, *al si mem.* — Ha, pendiginda virino!

LUBIN. — Al la diablo! Estos tre amuze, ĉar la edzo eĉ ne suspektos la sekretaĵojn; tio estas la plej bona; kaj li havos longan nazon kun sia ĵaluzeco. Ne vere?

GEORGO DANDIN. — Certe vere.

LUBIN. — Adiaŭ! Tenu la buŝon fermita. Konservu bone la sekreton, ke la edzo nenion sciu.

GEORGO DANDIN. — Jes, jes.

LUBIN. — Kio min koncernas, mi ŝajnigos, ke mi nenion scias. Mi estas granda ruzulo, kaj neniu povos diri, ke mi havas ian rilaton al la afero.



## SCENO TRIA.

GEORGO DANDIN, *sola*.

Nu, Georgo Dandin, vi vidas, en kia maniero via edzino kun vi agas! Jen kio venas, se oni volis edziĝi kun fraŭlino! Oni ĉirkaŭbatas vin de ĉiuj flankoj, kaj vi eĉ ne povas venĝi, kaj la nobeleco ligas al vi la manojn. Egaleco de la statoj lasas almenaŭ al la honoro de edzo la liberecon montri siajn sentojn; kaj se ĝi estus kampulino, vi estus nun tute libera fari al vi justecon per bona porcio da bastonbatoj. Sed vi volis gustumi nobelecon, kaj tedis vin esti mastro en via domo. Ha, mi furiozas el mia tuta koro, kaj mi volonte donus al mi vangofrapojn. Kio! senhonte aŭskulti la amesprimon de sinjoreto kaj al tio promesi ankoraŭ interkomunikigon! La diablo ĝin prenu! Tiaspecan okazon mi ne volas preterlasi. Kiel mi nun staras, mi devas tuj iri plendi al la patro kaj al la patrino kaj fari ilin atestantoj de la ĉagrenoj kaj malhonoro, kiun ilia filino al mi kaŭzas. Sed jen ili ambaŭ venas, tre ĝustatempe.

## SCENO KVARA.

S<sup>ro</sup> DE SOTENVILLE, S<sup>ino</sup> DE SOTENVILLE, GEORGO DANDIN.

S<sup>ro</sup> DE SOTENVILLE. — Kio estas, mia bofilo? Ŝajnas al mi, ke vi estas tre ekscitita.

GEORGO DANDIN. — Kaj mi havas kaŭzon por tio, kaj....

S<sup>ino</sup> DE SOTENVILLE. — Mia Dio! Kiel malmulte da ĝentileco vi havas, ke vi ne salutas la homojn, kiam vi aliras al ili!

GEORGO DANDIN. — KREDU al mi, mia bopatrino, mi havas aliajn aferojn en la kapo; kaj....

S<sup>ino</sup> DE SOTENVILLE. — Denove! Ĉu estas eble, nia bofilo, ke vi tiel malmulte konas la mondajn postulojn, kaj oni ne povas lernigi



al vi la manieron, en kiu oni devas vivi inter personoj de bona deveno?

GEORGO DANDIN. — Kial?

S<sup>ino</sup> DE SOTENVILLE. — Ĉu vi neniam en rilato al mi formetos la familiarecon de tiu vorto « bopatrino »? kaj ĉu vi ne povus alku-timiĝi diri al mi « sinjorino »?

GEORGO DANDIN. — Al ĉiuj patronoj! Se vi min nomas via bofilo, ŝajnas al mi, ke mi povas vin nomi mia bopatrino!

S<sup>ino</sup> DE SOTENVILLE. — Oni forte povus ion diri kontraŭ tio, kaj la aferoj ne estas egalaj. Sciu do, mi petas, ke ne por vi ĝi estas kon-vena uzi tiun vorton kun persono de mia situacio; ke, kvankam vi eĉ estas nia bofilo, estas granda diferenco inter vi kaj ni, kaj vi devas koni vin mem.

S<sup>ro</sup> DE SOTENVILLE. — Sufiĉe pri tio, mia amata; ni lasu ĝin.

S<sup>ino</sup> DE SOTENVILLE. — Mia Dio! sinjoro de Sotenville, vi havas ian apartan malseverecon, kaj vi ne scias devigi la homojn doni al vi tion, kio al vi decas.

S<sup>ro</sup> DE SOTENVILLE. — Al la diablo! Pardonu, pri tio oni ne povas fari al mi lecionojn, kaj en la daŭro de mia vivo mi per dudek bravaj agoj montris, ke mi ne estas homo, kiu lasus defali eĉ unu colon de miaj pretendoj; sed nun sufiĉas, ke ni donis al li negrand-an averton. Nun ni iom aŭdu, mia bofilo, kion vi havas en via kapo.

GEORGO DANDIN. — Ĉar mi devas paroli kategorie, mi diros al vi, sinjoro de Sotenville, ke mi havas kaŭzon....

S<sup>ro</sup> DE SOTENVILLE. — Kviete, mia bofilo! Sciu, ke ne estas respekte paroli al homoj per ilia nomo, kaj ke al tiuj, kiuj staras pli alte ol ni, oni devas diri simple « sinjoro ».

GEORGO DANDIN. — Nu, bone, simple sinjoro, kaj ne plu sinjoro de Sotenville, mi devas diri al vi, ke mia edzino....

S<sup>ro</sup> DE SOTENVILLE. — Haltu; sciu ankaŭ, ke vi ne devas diri « mia edzino », kiam vi parolas pri nia filino.



GEORGO DANDIN. — Mi povas fariĝi furioza! Kiel! Mia edzino ne estas mia edzino?

S<sup>ino</sup> DE SOTENVILLE. — Jes, nia bofilo, ŝi estas via edzino; sed vi ne devas permesi al vi nomi ŝin tiel; vi povus tion fari, se vi estus edzigita kun persono de via klaso.

GEORGO DANDIN, *al si mem.* — Ha, Georgo Dandin, kien vi enŝoviĝis! (*Laŭte.*) He, mi vin petas, lasu por momento flanke vian nobelecon kaj permesu, ke mi parolu al vi, kiel mi povas. (*Al si mem.*) La diablo prenu ĉiujn ĉi malbenitajn ceremoniojn! (*Al S<sup>ro</sup> de Sotenville.*) — Mi diras do al vi, ke mi estas malkontenta pri mia edziĝo.

S<sup>ro</sup> DE SOTENVILLE. — Kaj la kaŭzo, mia bofilo?

S<sup>ino</sup> DE SOTENVILLE. — Kio! Paroli tiamaniere pri afero, el kiu vi eltiris tiajn grandajn profitojn!

GEORGO DANDIN. — Kaj kiajn profitojn, sinjorino, se sinjorino nepre volas sin enmiksi? La historio estis ne malbona por vi, ĉar sen mi viaj aferoj — volu min pardoni — estis tre kadukaj, kaj mia mono servis por ŝtopi tre rimarkeblajn truojn; sed mi, kion mi profitis, mi vin petas? nur plilongigon de mia nomo, ĉar anstataŭ « Georgo Dandin » mi ricevis de vi la titolon « sinjoro de la Dandinière ».

S<sup>ro</sup> DE SOTENVILLE. — Ĉu vi kalkulas kiel nenion, mia bofilo, la honoron, ke vi parenciĝis kun la domo de Sotenville?

S<sup>ino</sup> DE SOTENVILLE. — Kaj kun la domo de la Prudoterie, el kiu mi havas la honoron deveni; domo, en kiu ankaŭ la virina linio nobeligas, kaj kiu, dank' al tiu bela privilegio, faros viajn infanojn nobeloj?

GEORGO DANDIN. — Jes, tre bone, miaj infanoj estos nobeloj, sed mi estos trompita koko, se oni ne faros ordon.

S<sup>ro</sup> DE SOTENVILLE. — Kion vi volas diri, mia bofilo?

GEORGO DANDIN. — Mi volas diri, ke via filino ne kondutas tiel, kiel edzino devas konduti, kaj ke ŝi faras aferojn, kiuj estas kontraŭaj al la honoro.



S<sup>ino</sup> DE SOTENVILLE. — Haltu; gardu vin pri tio, kion vi parolas. Mia filino devenas de gento, kiu estas tro plena de virto, por fari iam ian aferon, de kiu la honesteco povus esti difektita; kaj koncerne la domon de la Prudoterie, oni dank' al Dio de tricent jaroj tie ne vidis virinon, kiu donus kaŭzon, ke oni parolu pri ŝi.

S<sup>ro</sup> DE SOTENVILLE. — Al la diablo! En la domo de Sotenville oni neniam vidis koketulinon; kaj la ĉasteco ĉe la virinoj tie estas ne malpli hereda, ol la kuraĝeco ĉe la viroj.

S<sup>ino</sup> DE SOTENVILLE. — Ni havis iun Jakelinon de la Prudoterie, kiu ne volis esti amdonantino de duko kaj regna konsilisto, reganto de nia provinco.

S<sup>ro</sup> DE SOTENVILLE. — Ekzistis iu Maturino de Sotenville, kiu rifuzis akcepti dudek mil talerojn de reĝa favorato, kiu volis nur havi la privilegion libere paroli kun ŝi.

GEORGO DANDIN. — Nu, via filino ne estas tiel obstina, kaj ŝi fariĝis malpli sovaĝa de la tempo, kiam ŝi estas ĉe mi.

S<sup>ro</sup> DE SOTENVILLE. — Parolu pli klare, mia bofilo. Ni ne estas tiaj homoj, kiuj protektus ŝin en malbonaj faroj, kaj ni la unuaj, ŝia patrino kaj mi, estas pretaj doni al vi justecon pri tio.

S<sup>ino</sup> DE SOTENVILLE. — Ni komprenas neniajn ŝercojn en aferoj, kiuj koncernas honoron, kaj ni edukis ŝin en la plej granda severeco.

GEORGO DANDIN. — Ĉio, kion mi povas diri al vi, estas, ke troviĝas ĉi tie iu kortegulo, kiun vi vidis, kiu montras al ŝi amon antaŭ mia nazo, kaj kiu faris al ŝi pri sia amo certigan klarigon, kiun ŝi aŭskultis tre homame.

S<sup>ino</sup> DE SOTENVILLE. — Granda Dio! Mi ŝin sufokus per miaj propraj manoj, se montriĝus, ke ŝi dekliniĝis de la honesteco de sia patrino.

S<sup>ro</sup> DE SOTENVILLE. — Al la diablo! Mi trapikus per mia spado ŝin kaj ŝian amanton, se ŝi pekus kontraŭ sia honoro.

GEORGO DANDIN. — Mi rakontis al vi la fakton, por prezenti



al vi miajn plendojn; kaj mi postulas de vi kontentigon pri tiu afero.

S<sup>ro</sup> DE SOTENVILLE. — Estu tute trankvila, mi donos al vi kontentigon de la flanko de ili ambaŭ; al kiu ajn oni devas meti la pugnon al la brusto, mi taŭgas por tio. Sed ĉu vi estas tute certa pri tio, kion vi diras al mi?

GEORGO DANDIN. — Tute certa.

S<sup>ro</sup> DE SOTENVILLE. — Gardu vin bone; ĉar inter nobeloj tio ĉi estas tiklaj aferoj, kaj estas danĝere, se oni faras en tio ian maltrafon.

GEORGO DANDIN. — Mi diris al vi nenion, kio estus malvera.

S<sup>ro</sup> DE SOTENVILLE. — Mia koro, iru paroli kun via filino, dum mi kun mia bofilo iros paroli kun la viro.

S<sup>ino</sup> DE SOTENVILLE. — Ĉu ĝi estas ebla, mia filo, ke ŝi sin tiom forgesus, post la virta ekzemplo, kiun, kiel vi mem scias, mi donis al ŝi!

S<sup>ro</sup> DE SOTENVILLE. — Ni klarigos la aferon. Sekvu min, mia bofilo, kaj zorgu pri nenio. Vi vidos, per kia ligno ni nin hejtas, kiam oni faras atencon pri tiuj, kiuj apartenas al ni.

GEORGO DANDIN. — Jen li mem venas al ni renkonte.

#### SCENO KVINA.

S<sup>ro</sup> DE SOTENVILLE, KLITANDRO, GEORGO DANDIN.

S<sup>ro</sup> DE SOTENVILLE. — Sinjoro, ĉu vi min konas?

KLITANDRO. — Kiom mi scias,... ne.

S<sup>ro</sup> DE SOTENVILLE. — Mia nomo estas barono de Sotenville.

KLITANDRO. — Mi tre ĝojas.

S<sup>ro</sup> DE SOTENVILLE. — Mia nomo estas konata ĉe la kortego; kaj en mia juneco mi havis la honoron esti el la unuaj, kiuj distingiĝis ĉe la nobelara armiĝo en Nancy.

KLITANDRO. — Mi gratulas.



S<sup>ro</sup> DE SOTENVILLE. — Sinjoro mia patro, Jean-Gilles de Sotenville, havis la gloron partopreni persone en la granda sieĝo de Montauban.

KLITANDRO. — Mi estas ravita.

S<sup>ro</sup> DE SOTENVILLE. — Mi havis praavon, Bertrandon de Sotenville, kiu estis tiel eminenta en sia tempo, ke li ricevis la permeson vendi sian tutan bienon, por veturi trans la maron.

KLITANDRO. — Mi volonte kredas.

S<sup>ro</sup> DE SOTENVILLE. — Oni raportis al mi, sinjoro, ke vi amas kaj persekutas iun junan personon, kiu estas mia filino, kaj pri kiu mi interesigas tiel same, kiel pri la homo, kiun vi vidas (*montrante Georgon Dandin*), kaj kiu havas la honoron esti mia bofilo.

KLITANDRO. — Kiu? mi?

S<sup>ro</sup> DE SOTENVILLE. — Jes; kaj estas al mi tre agrable paroli kun vi, por ricevi de vi, mi petas, klarigon pri tiu afero.

KLITANDRO. — Ĝi estas stranga kalumnio! Kiu tion diris al vi?

S<sup>ro</sup> DE SOTENVILLE. — Iu, kiu pensas, ke li bone tion scias.

KLITANDRO. — Tiu iu mensogis. Mi estas honesta homo. Ĉu vi opinias min kapabla, sinjoro, por tia malnobla agado? Mi amindumus junan kaj belan personon, kiu havas la honoron esti la filino de sinjoro barono de Sotenville! Mi tro multe vin respektas kaj tro multe estas preta vin servi, por ke mi faru ion similan. Kiu ajn tion diris al vi, estas malsaĝulo.

S<sup>ro</sup> DE SOTENVILLE. — Nu, mia bofilo?

GEORGO DANDIN. — Kio?

KLITANDRO. — Estas fripono kaj sentaŭgulo.

S<sup>ro</sup> DE SOTENVILLE, *al Georgo Dandin*. — Respondu!

GEORGO DANDIN. — Respondu vi mem!

KLITANDRO. — Se mi scius, kiu li povas esti, mi enpuŝus al li, en via alesto, la spadon en la ventron.

S<sup>ro</sup> DE SOTENVILLE, *al Georgo Dandin*. — Pruvu do la aferon

GEORGO DANDIN. — Ĝi estas tute pruvita. Ĝi estas vero.



KLITANDRO. — Ĉu ĝi estas via bofilo, sinjoro, kiu...?

S<sup>ro</sup> DE SOTENVILLE. — Jes, li estas ĝuste tiu, kiu plendis al mi pri tio.

KLITANDRO. — Certe, ĝi estas lia feliĉo, ke li havas la honoron aparteni al vi; alie mi bone instruus lin fari tiajn parolojn pri persono kiel mi.

SCENO SESA.

S<sup>ro</sup> DE SOTENVILLE, S<sup>ino</sup> DE SOTENVILLE, ANGELIKO,  
KLITANDRO, GEORGO DANDIN, KLAŬDINO.

S<sup>ino</sup> DE SOTENVILLE. — Koncerne tion mi devas diri, ke la ĵaluzo estas efektive stranga afero. Mi alkondukas ĉi tien mian filinon, por klarigi la aferon en ĉies alesto.

*koncerne*

KLITANDRO, *al Angeliko*. — Ĉu ĝi estas vi, sinjorino, kiu diris al via edzo, ke mi vin amas?

ANGELIKO. — Mi? Kiel mi povus tion diri al li? Ĉu ĝi estas vero? Mi volus efektive vidi, ke vi provus min ami! Provu ĝin, mi vin petas; vi vidus, kun kiu vi parolas! Mi konsilas al vi tion fari. Uzu ĉiujn artifikaĵojn de amantoj; provu iom, por plezuro, sendi al mi sendatojn, skribi al mi sekrete amajn leteretojn, serĉi la momentojn, kiam mia edzo ne estas hejme, aŭ kiam mi eliras, kaj parolu al mi pri via amo: vi bezonas nur veni, mi promesas al vi, ke vi estos dece akceptita.

KLITANDRO. — Nu, nu, sinjorino, kviete! Ne estas necese fari al mi tiom da lecionoj kaj tiom skandaligi. Kiu diris al vi, ke mi havas la ideon vin ami?

ANGELIKO. — Kiel mi povas scii, kion oni ĉi tie rakontis?

KLITANDRO. — Oni rakontu, kion oni volas; sed vi ja scias, ĉu mi parolis kun vi pri amo, kiam mi vin renkontis.

ANGELIKO. — Vi devus nur tion fari, vi havus bonan akcepton!

KLITANDRO. — Mi certigas vin, ke kun mi vi devas nenion timi:



mi ne estas tia homo, kiu faras ĉagrenon al belulinoj; kaj mi vin tro respektas, vin kaj viajn estimatajn gepatrojn, por ke mi havu la penson enamiĝi en vin.

S<sup>ino</sup> DE SOTENVILLE, *al Georgo Dandin*. — Nu, vi vidas?

S<sup>ro</sup> DE SOTENVILLE. — Jen vi estas kontentigita, mia bofilo. Kion vi diros al tio?

GEORGO DANDIN. — Mi diros, ke tio estas fabeloj por enluligi; ke mi bone scias, kion mi scias, kaj ke, ĉar mi jam devas paroli klare, ŝi ĵus akceptis komisiulon de li.

ANGELIKO. — Mi? mi akceptis komisiulon?

KLITANDRO. — Mi sendis komisiulon?

ANGELIKO. — Klaŭdino!

KLITANDRO, *al Klaŭdino*. — Ĉu estas vere?

KLAŬDINO. — Mian vorton de honoro, ĝi estas stranga malveraĵo!

GEORGO DANDIN. — Silentu, vi malĉastulino. Mi bone vin konas. Ĝi estas vi, kiu ĵus enkondukis la komisiulon.

KLAŬDINO. — Kiu? mi?

GEORGO DANDIN. — Jes, vi. Ne ludu rolon de purulino.

KLAŬDINO. — Ho ve, kiel la mondo nun estas plena de malboneco! tiele min suspekti, min, kiu estas la senkulpeco mem!

GEORGO DANDIN. — Silentu, virinaĉo! vi ludas la rolon de modestulino, sed mi konas vin jam de longe, vi estas ruza kanajlo.

KLAŬDINO, *al Angeliko*. — Sinjorino, ĉu...

GEORGO DANDIN. — Silentu, mi diras al vi! alie vi povus tre kare pagi por ĉiuj, ĉar vi ja ne havas patron nobelon.

ANGELIKO. — Ĝi estas kalumnio tiel granda, kaj kiu tiel forte vundas mian koron, ke mi ne povas eĉ havi la forton por respondi. Ĝi estas ja io terura, esti akuzata de edzo, kiam oni faris al li nenion, kio estas ne farinda! Ho ve, se mi meritas ian riproĉon, ĝi estas nur tio, ke mi agis kun li tro bone.

KLAŬDINO. — Certe.

ANGELIKO. — Mia tuta malfeliĉo estas tio, ke mi tro zorgas pri li;



la ĉielo volu, ke mi estu kapabla toleri, kiel li diras, ies amindumaĵojn! mi ne estus tiam tiel plendinda. Adiaŭ, mi foriras; mi ne povas plu toleri, ke oni min tiamaniere ofendu.

## SCENO SEPA.

S<sup>ino</sup> DE SOTENVILLE, S<sup>ro</sup> DE SOTENVILLE, KLITANDRO,  
GEORGO DANDIN, KLAŬDINO.

S<sup>ino</sup> DE SOTENVILLE, *al Georgo Dandin*. — Iru, vi ne meritas la honestan edzinon, kiun oni donis al vi.

KLAŬDINO. — Vorton de honoro, li meritus, ke ŝi verigu tion, kion li diris; kaj, se mi estus sur ŝia loko, mi ne longe marĉandus. (*Al Klitandro.*) Jes, sinjoro, vi devus nun, por lin puni, amindumi mian mastrinon. Komencu kuraĝe, mi tion diras al vi, ĝi estos tre ĝustatempa; kaj mi proponas al vi, ke mi vin helpas, ĉar li ja tiamaniere min jam taksas. (*Klaŭdino foriras.*)

S<sup>ro</sup> DE SOTENVILLE. — Vi meritas, mia bofilo, ke oni diru al vi tiajn aferojn; via agado indignigas ĉiujn kontraŭ vi.

S<sup>ino</sup> DE SOTENVILLE. — Iru, penu agi pli bone kun fraŭlino altedevena; kaj gardu vin de nun, ke vi plu ne faru tiajn eraregojn.

GEORGO DANDIN, *al si mem*. — Mi estas tute furioza, ke mi staras kiel malpravulo, dum mi estas prava.

## SCENO OKA.

S<sup>ro</sup> DE SOTENVILLE, KLITANDRO, GEORGO DANDIN.

KLITANDRO, *al S<sup>ro</sup> de Sotenville*. — Sinjoro, vi vidas, kiel false mi estis akuzita: vi estas homo, kiu scias la principojn de honoro, kaj mi postulas de vi kontentigon por la honto, kiu estas farita al mi.

S<sup>ro</sup> DE SOTENVILLE. — Tio estas tute justa kaj tute laŭ la ordo. Nu, mia bofilo, donu kontentigon al la sinjoro.



GEORGO DANDIN. — Kio? kontentigon?

S<sup>ro</sup> DE SOTENVILLE. — Jes, la ordo tion postulas, ĉar vi malprave lin akuzis.

GEORGO DANDIN. — Sed tio ja estas la afero, ke mi tute ne konsentas, ke mi lin malprave akuzis; kaj mi bone scias, kion mi pri tio pensas.

S<sup>ro</sup> DE SOTENVILLE. — Tio ne estas grava. Kia ajn penso povus resti ĉe vi, li neis, kaj tio devas sufiĉi; kaj oni ne havas rajton plendi pri iu, se li neas kulpecon.

GEORGO DANDIN. — Sekve, se mi lin trovas kuŝanta kun mia edzino, li devus nur nei, kaj tio lin jam senkulpigus?

S<sup>ro</sup> DE SOTENVILLE. — Ne rezonadu. Petu lin pri pardono, kiel mi diras al vi.

GEORGO DANDIN. — Mi! Mi devas ankoraŭ peti lin pri pardono, post tio, ke...

*mem* S<sup>ro</sup> DE SOTENVILLE. — Rapide, mi diras al vi, vi havas nenion por pripensi; kaj vi ne devas timi, ke vi faras tro multe, ĉar mi mem ja tion konsilas al vi.

GEORGO DANDIN. — Mi ne povas....

S<sup>ro</sup> DE SOTENVILLE. — Al la diablo! mia bofilo, ne incitu al mi la galon, ĉar mi kuniĝus kun li kontraŭ vi. Nu, lasu, ke mi vin gvidu.

GEORGO DANDIN, *al si mem*. — Ha, Georgo Dandin!

S<sup>ro</sup> DE SOTENVILLE. — Antaŭ ĉio prenu vian ĉapon en la manon: la sinjoro estas nobelo, kaj vi ne estas tia.

GEORGO DANDIN, *al si mem, tenante la ĉapon en la mano*. — Mi krevas de furiozo!

S<sup>ro</sup> DE SOTENVILLE. — Ripetu post mi: Sinjoro...

GEORGO DANDIN. — Sinjoro...

S<sup>ro</sup> DE SOTENVILLE. — Mi petas vian pardonon... (*Vidante, ke Georgo Dandin penas ne obei lin.*) Ha!

GEORGO DANDIN. — Mi petas vian pardonon...



S<sup>ro</sup> DE SOTENVILLE. — Pri la malbonaj pensoj, kiujn mi havis rilate vin....

GEORGO DANDIN. — Pri la malbonaj pensoj, kiujn mi havis rilate vin.

S<sup>ro</sup> DE SOTENVILLE. — Ĝi estis kaŭzita de tio, ke mi ne havis la honoron vin koni....

GEORGO DANDIN. — Ĝi estis kaŭzita de tio, ke mi ne havis la honoron vin koni....

S<sup>ro</sup> DE SOTENVILLE. — Kaj mi petas vin kredi...

GEORGO DANDIN. — Kaj mi petas vin kredi...

S<sup>ro</sup> DE SOTENVILLE. — Ke mi estas via servanto.

GEORGO DANDIN. — Vi volas, ke mi estu servanto de homo, kiu volas fari min trompita koko?

S<sup>ro</sup> DE SOTENVILLE, *farante al li signon de minaco*. — Ha!

KLITANDRO. — Sufiĉas, sinjoro.

S<sup>ro</sup> DE SOTENVILLE. — Ne, mi volas, ke li finu, kaj ke ĉio estu farata laŭforme.... Ke mi estas via servanto.

GEORGO DANDIN. — Ke mi estas via servanto.

KLITANDRO, *al Georgo Dandin*. — Sinjoro, mi estas tutkore via, kaj mi plu ne pensas pri tio, kio okazis. (*Al S<sup>ro</sup> de Sotenville*.) Al vi, sinjoro, mi diras adiaŭ, kaj mi bedaŭras la malgrandan ĉagrenon, kiun vi havis.

S<sup>ro</sup> DE SOTENVILLE. — Mi kisas al vi la manojn; kaj se ĝi plaĉos al vi, mi liveros al vi la amuziĝon ĉasi kun mi leporon.

KLITANDRO. — Vi estas tro bona kontraŭ mi. (*Klitandro foriras*.)

S<sup>ro</sup> DE SOTENVILLE. — Jen, mia bofilo, kiel oni devas konduki la aferojn! Adiaŭ. Sciu, ke vi eniris en familion, kiu donos al vi apogon kaj neniam toleros, ke oni faru al vi ian honton.



## SCENO NAŬA.

GEORGO DANDIN, *sola.*

Ha, kiel mi.... Vi ĝin volis, vi ĝin volis, Georgo Dandin, vi ĝin volis! Ĝi konvenas al vi bone, kaj vi estas ĝuste aranĝita : vi havas juste tion, kion vi meritis. Nu, oni devas nur malfermi la okulojn al la patro kaj al la patrino; eble mi trovos ian rimedon, por tion atingi.

---



## AKTO DUA

## SCENO UNUA.

KLAŬDINO, LUBIN.

KLAŬDINO. — Jes, mi tuj divenis, ke ĝi certe venas de vi, kaj ke vi ĝin diris al iu, kiu ĉion rakontis al nia mastro.

LUBIN. — Mi ĵuras al vi, mi nur pasante diris pri ĝi unu vorton al iu homo, por ke li ne diru, ke li vidis, ke mi eliris el la domo; videble la homoj en tiu ĉi lando estas grandaj babiluloj.

KLAŬDINO. — Efektive, sinjoro la vicgrafo faris bonan elekton, prenante vin kiel sian sendaton! li uzas la servon de homo tre dube fidinda!

LUBIN. — Nu, alian fojon mi estos pli ruza kaj mi pli min gardos.

KLAŬDINO. — Jes, jes, estos la ĝusta tempo.

LUBIN. — Ni ne parolu plu pri tio. Aŭskultu.

KLAŬDINO. — Kion vi volas, ke mi aŭskultu?

LUBIN. — Turnu iom vian vizaĝon al mi.

KLAŬDINO. — Nu, kion do vi volas?

LUBIN. — Klaŭdino!

KLAŬDINO. — Kio?

LUBIN. — He, he, ĉu vi ne scias tre bone, kion mi volas diri?

KLAŬDINO. — Ne.

LUBIN. — Al la diablo! mi vin amas.

KLAŬDINO. — Efektive?

LUBIN. — Jes, la diablo min prenu! Vi povas kredi al mi, ĉar mi ĝin ĵuras.

KLAŬDINO. — Nu, bone,

LUBIN. — Mi sentas, ke mia tuta koro tremas, kiam mi vin rigardas.

KLAŬDINO. — Mi tre ĝojas.



LUBIN. — Kiamaniere vi tion faras, ke vi estas tiel bela?

KLAŬDINO. — Tiel same, kiel faras la aliaj.

LUBIN. — Vidu, oni ne bezonas tiom da ceremonioj: se vi volas, vi estos mia edzino kaj mi estos via edzo; kaj ni ambaŭ estos geedzoj.

KLAŬDINO. — Vi eble estus tiel ĵaluza, kiel nia mastro?

LUBIN. — Tute ne!

KLAŬDINO. — De mia flanko, mi malamas la suspektemajn edzojn; kaj mi volas tian edzon, kiu ne timas ĉion, kiu estus tiom plena de konfido al mi kaj tiel certa pri mia ĉasteco, ke li sen maltrankvileco povus min vidi en la mezo de tridek viroj.

LUBIN. — Bone! mi estos tute tia.

KLAŬDINO. — Ĝi estas la plej malsaĝa afero en la mondo, kiam oni ne konfidas al edzino, kaj oni ŝin turmentas. Kaj en efektiveco oni ĉe tio nenion gajnas: ĝuste tio devigas nin pensi pri malbono; kaj ofte la edzoj mem, per sia bruego, faras el si tion, kio ili estas.

LUBIN. — Nu, mi donos al vi la liberecon fari ĉion, kio al vi plaĉos.

KLAŬDINO. — Jen tiel oni devas agi, se oni ne volas esti trompata. Kiam edzo fidas nian honestecon, ni prenas el la libereco nur tiom, kiom ni bezonas; ĝi estas tiel same, kiel kun tiuj, kiuj malfermas al ni sian monujon kaj diras al ni: « prenu! » Ni faras el ĝi uzon honeste, kaj ni kontentiĝas per tio, kio estas justa. Sed se iu nin ĉikanas, ni penas lin tondi, kaj ni tute lin ne indulgas.

LUBIN. — Bone, mi estos el tiuj, kiuj malfermas sian monujon, kaj vi bezonas nur edziniĝi kun mi.

KLAŬDINO. — Bone, bone, ni vidos.

LUBIN. — Venu do ĉi tien, Klaŭdino.

KLAŬDINO. — Kion vi volas?

LUBIN. — Venu, mi diras al vi.

KLAŬDINO. — Ha, kviete! Mi ne amas la palpistojn.

LUBIN. — He, iomete, pro amikeco.

KLAŬDINO. — Lasu min, mi diras al vi; mi ne komprenas ŝercojn.



LUBIN. — Klaŭdino !

KLAŬDINO, *repuŝante lin.* — He, for !

LUBIN. — Ha, kiel kruda vi estas kun homoj ! Fi ! kiel neĝentila ĝi estas tiel forpuŝi personojn ! Ĉu vi tute ne hontas esti bela kaj ne voli, ke oni vin karesu ? He, lasu do ! do

KLAŬDINO. — Mi donos al vi sur la nazon.

LUBIN. — Ho, kia malcedema, kia sovaĝa ! Fi ! Estas malbele esti tiel kruela !

KLAŬDINO. — Vi fariĝas tro libera.

LUBIN. — Kion do ĝi kostos al vi, se vi lasos min iom petoli kun vi ? do

KLAŬDINO. — Vi devas havi paciencon.

LUBIN. — Nur unu kiseton, partopage de nia edziĝo.

KLAŬDINO. — Mi dankas por tio.

LUBIN. — Klaŭdino, mi vin petas, vi ĝin deprenos de la kalkulo.

KLAŬDINO. — He, certe ne ! Mi jam unu fojon enfalis. Adiaŭ ! Iru for, kaj diru al sinjoro la vicgrafo, ke mi akurate transdonos lian bileton.

LUBIN. — Adiaŭ, sovaĝa belulino !

KLAŬDINO. — La vorto montras enamiĝon.

LUBIN. — Adiaŭ, roko, ŝtono, marmoro, ĉio plej malmola en la mondo.

KLAŬDINO, *sola.* — Mi tuj transdonos en la manojn de mia mas-trino... Sed jen ŝi venas kun sia edzo ; mi foriĝu kaj atendu, ĝis ŝi estos sola.

#### SCENO DUA.

GEORGO DANDIN, ANGELIKO.

GEORGO DANDIN. — Ne, ne, oni ne trompas min tiel facile ; kaj mi nur estas tro certa, ke tio, kion oni diris al mi, estas vera. Mi havas pli bonajn okulojn, ol kiel oni pensas, kaj via galimatio tute min ne blindigis.



## SCENO TRIA.

KLITANDRO, ANGELIKO, GEORGO DANDIN.

KLITANDRO, *aparte, en la profundo de la scenejo*. — Ha, jen ŝi estas; sed ŝia edzo estas kune kun ŝi.

GEORGO DANDIN, *ne vidante Klitandron*. — Trae de ĉiuj viaj grimacoj mi vidis la verecon de tio, kion oni diris al mi, kaj kiom malmulte da respekto vi havas por la ligo, kiu nin unuigas. (*Klitandro kaj Angeliko reciproke sin salutas.*) Mia Dio, lasu vian riverencon; ne pri tia speco de respekto mi parolas al vi, kaj vi ne devas ankoraŭ moki.

ANGELIKO. — Mi? mi mokas? neniel!

GEORGO DANDIN. — Mi scias, kion vi pensas, kaj mi konas... (*Klitandro kaj Angeliko sin denove reciproke salutas.*) Denove! Ha, ĉesu do fari ŝercojn! Mi scias tre bone, ke pro via nobeleco vi rigardas min, kiel starantan tre malsupre de vi; sed la respekto, pri kiu mi parolas al vi, tute ne koncernas mian personon. Mi parolas pri tiu respekto, kiun vi ŝuldas al ligo tiel estimeginda, kiel estas la ligo de edzeco.... (*Angeliko faras signon al Klitandro.*) Ne levu la ŝultrojn, mi tute ne parolas malsaĝaĵojn.

ANGELIKO. — Sed kiu levas la ŝultrojn?

GEORGO DANDIN. — Mia Dio! Mi vidas tre klare. Mi diras al vi ankoraŭ unu fojon, ke la edzeco estas ĉeno, al kiu oni devas rilati kun la plej granda respekto, kaj estas tre malbone, fari el ĝi tian uzon, kian vi faras. (*Angeliko faras al Klitandro signon per la kapo.*) Jes, jes, tre malbone de via flanko; kaj vi tute ne bezonas balanci la kapon kaj fari al mi grimacojn.

ANGELIKO. — Mi? mi ne scias, kion vi volas diri.

GEORGO DANDIN. — Sed mi tion scias tre bone; kaj vian maleslimon mi konas. Se mi ne naskiĝis nobelo, almenaŭ mi estas el familio, al kiu oni povas fari neniun riproĉon; kaj la familio de la Dandin'oj...



KLITANDRO, *malantaŭ Angeliko, ne rimarkate de Georgo Dandin.* — Nur unu vorton!

GEORGO DANDIN, *ne vidante Klitandron.* — Kio?

ANGELIKO. — Kio? mi nenion diris. (*Georgo Dandin turnas sin ĉirkaŭ sian edzinon, kaj Klitandro foriĝas, farante grandan riverencon al Georgo Dandin.*)

## SCENO KVARA.

GEORGO DANDIN, ANGELIKO.

GEORGO DANDIN. — Jen li vagis ĉirkaŭ vi!

ANGELIKO. — Nu, ĉu ĝi estas mia kulpo? Kion vi volas, ke mi faru kontraŭ tio?

GEORGO DANDIN. — Mi volas, ke vi faru kontraŭ tio tion, kion faras virino, kiu volas plaĉi nur al sia edzo. Kion ajn oni dirus, la amistoj altrudas sin nur tiam, kiam oni tion akceptas. Ekzistas certa dolĉa mieno, kiu ilin altiras, tiel same, kiel la mielo la muŝojn; sed la honestaj virinoj havas rimedojn, kiuj forpelas ilin tuj en la komenco.

ANGELIKO. — Mi, ilin forpeli! Sed pro kia kaŭzo? Mi tute ne vidas en ĝi ian skandalon, se oni min trovas bela; kaj tio faras al mi plezuron.

GEORGO DANDIN. — Jes! Sed kian rolon la edzo povas ludi ĉe tiu ĉi amindumado?

ANGELIKO. — La rolon de honesta homo, kiu ĝojas, se lia edzino estas ŝatata.

GEORGO DANDIN. — Mi vin tre dankas por tio. Ĝi tute ne estas laŭ mia gusto; kaj la Dandin'oj tute ne al kutimiĝis al tiu modo.

ANGELIKO. — Ho, la Dandin'oj al kutimiĝos, se ili volos; ĉar miaflanke mi deklaras al vi, ke mi ne havas la intencon forrifuzi la mondon kaj vivante enterigi min en edzon. Kio! ĉar viro ekpensas edziĝi kun ni, tial estas necese, ke ĉio finiĝu por ni kaj ke ni rompu ĉiujn interrilatojn kun la vivantoj! Ĝi estas mirinda



afero, tiu tiraneco de sinjoroj la edzoj ; kaj tio al mi plaĉas, ke ili volas, ke oni mortu por ĉiuj amuzoj kaj oni vivu nur por ili ! Mi mokas tion, kaj mi tute ne volas morti tiel juna.

GEORGO DANDIN. — Tiele do vi plenumas la ŝuldiĝon de la ĵuro, kiun vi faris al mi publike ?

ANGELIKO. — Mi ? mi ne faris ĝin al vi propavole, vi ĝin elŝiris de mi. Ĉu antaŭ la edziĝo vi demandis pri mia konsento kaj ĉu mi vin volas ? Vi demandis pri tio nur mian patron kaj mian patrinon ; en efektiveco ja nur ili edziĝis kun vi ; tial estos bone, se vi ĉiam al ili plendos, se oni agas kun vi maljuste. Kio koncernas min, kiu tute ne petis vin, ke vi edziĝu kun mi, kaj kiun vi prenis, ne demandinte miajn sentojn, mi pretendas, ke mi ne havas la devon sklave submeti min al viaj deziroj ; kaj mi volas ĝui, mia sinjoro, la kelkan nombron da belaj tagoj, kiun donas al mi mia juneco, preni al mi la dolĉan liberecon, kiun la aĝo al mi permesas, vidi iom la belan societon, kaj gustumi la plezuron aŭdi dolĉajn vortojn, kiujn oni diras al mi. Prepariĝu al tio, ke ĝi estu via puno, kaj danku la ĉielon, ke mi ne estas kapabla por io pli malbona.

GEORGO DANDIN. — Jes, tiel vi prenas la aferon ! Sed mi estas via edzo, kaj mi diras al vi, ke mi tion ne volas.

ANGELIKO. — Kaj mi, mi estas via edzino, kaj mi diras al vi, ke mi tiel volas.

GEORGO DANDIN, *al si mem.* — Mi havas grandan deziron fari kompoton el ŝia tuta vizaĝo kaj meti ŝin en tian staton, ke ŝi pluneniĝu en sia vivo plaĉu al la dirantoj de flataĵoj. Iru, Georgo Dandin ; mi ne povus min deteni, kaj estas pli bone forlasi la lokon.

#### SCENO KVINA.

ANGELIKO, KLAŬDINO.

KLAŬDINO. — Kun malpacienco mi atendis, sinjorino, ke li foriru, por ke mi transdonu al vi ĉi tiujn liniojn de tiu, pri kiu vi scias.



ANGELIKO. — Ni vidu.

KLAŬDINO, *al si mem.* — Kiom mi povas rimarki, tio, kion oni skribas al ŝi, ne tre malplaĉas al ŝi.

ANGELIKO. — Ha, Klaŭdino, kiel ĝentile ĉio estas esprimita en tiu ĉi bileto! Kian agrablan manieron la korteguloj havas en ĉiuj siaj paroloj kaj en ĉiuj siaj agoj! Kaj kio estas, en komparo kun ili, niaj provinculoj?

KLAŬDINO. — Mi pensas, ke, post kiam vi vidis tiujn, la Dandin'oj ne povas plaĉi al vi.

ANGELIKO. — Restu ĉi tie, mi iros skribi la respondon.

KLAŬDINO, *sola.* — Ŝajnas al mi, ke mi ne bezonas rekomendi al ŝi, ke ŝi faru la respondon agrabla. Sed jen...

SCENO SESA.

KLITANDRO, LUBIN, KLAŬDINO.

KLAŬDINO. — Vere, sinjoro, vi tie prenis al vi lertan komisiulon!

KLITANDRO. — Mi ne kuraĝis sendi iun el miaj homoj. Sed, mia bona Klaŭdino, mi devas ja rekompenci vin por la bonaj servoj, kiujn, kiel mi scias, vi faris al mi. (*Li serĉfosas en sia poŝo.*)

KLAŬDINO. — He, sinjoro, ne estas necese. Vi tute ne bezonas fari al vi tiun klopodon; mi faras al vi servojn, ĉar vi ilin meritas, kaj mi sentas en mia koro inklinon por vi.

KLITANDRO, *donante monon al Klaŭdino.* — Mi vin tre dankas.

LUBIN, *al Klaŭdino.* — Ĉar ni edziĝos, tial donu tion al mi, por ke mi ĝin konservu kune kun mia mono.

KLAŬDINO. — Mi ĝin konservos por vi tiel same, kiel la kison.

KLITANDRO, *al Klaŭdino.* — Diru al mi, ĉu vi transdonis mian bileton al via bela mastrino?

KLAŬDINO. — Jes; ŝi jam skribas respondon al vi.

KLITANDRO. — Sed, Klaŭdino, ĉu ne estas eble, ke mi povu persone paroli kun ŝi?



KLAŬDINO. — Jes; venu kun mi, mi donos al vi la eblon paroli kun ŝi.

KLITANDRO. — Sed ĉu ŝi tion aprobos? kaj ĉu estas nenia risko?

KLAŬDINO. — Ne, ne! Ŝia edzo ne estas en la loĝejo; kaj krom tio ne pri li ŝi devas plej multe zorgi: nur antaŭ siaj gepatroj ŝi devas sin gardi; kaj se nur pri ili estas zorgite, ĉion ceteran oni ne bezonas timi.

KLITANDRO. — Mi lasas min al via gvidado.

LUBIN, *sola*. — Al la diablo! Jen saĝan edzinon mi havos! Ŝi havas spriton kiel kvar.

#### SCENO SEPA.

#### GEORGO DANDIN, LUBIN.

GEORGO DANDIN, *al si mem*. — Jen estas mia homo de antaŭe. Ho, se mi povus ĝin atingi, ke li atestu al la gepatroj tion, kion ili ne volas kredi!

LUBIN. — Ha, jen vi estas, sinjoro babilulo, al kiu mi tiel forte rekomendis nenion paroli, kaj kiu ĝin tiel forte promesis al mi! Vi estas do babilisto, kaj vi tuj ĉion transdiras, kion oni diras al vi sekrete?

GEORGO DANDIN. — Mi?

LUBIN. — Jes, vi ĉion raportis al la edzo, kaj vi estas la kaŭzo de tio, ke li faris bruegon. Mi ĝojas, ke mi nun scias, ke vi havas tian langon; kaj tio min instruos, ke mi nenion plu diru al vi.

GEORGO DANDIN. — Aŭskultu, mia amiko...

LUBIN. — Se vi ne estus babilinta, mi rakontus al vi, kio fariĝas en la nuna momento; sed pro puno vi nenion scios.

GEORGO DANDIN. — Kio? kio do fariĝas?

LUBIN. — Nenio, nenio. Jen kio estas, se oni babilis; vi ne sciigos eĉ unu vorton, kaj pri la plej interesa parto mi silentos.

GEORGO DANDIN. — Haltu do iom.

LUBIN. — Neniel.



GEORGO DANDIN. — Mi volas diri al vi nur unu vorton.

LUBIN. — Ho ne, ho ne! Vi volas eltiri de mi la sekreton.

GEORGO DANDIN. — Ne, ne tion.

LUBIN. — He, vi pensas, ke mi estas malsaĝa! Mi vidas, kion vi celas.

GEORGO DANDIN. — Estas io tute alia. Aŭskultu.

LUBIN. — Vi nenion atingos. Vi volus, ke mi diru al vi, ke sinjoro la vicgrafo donis monon al Klaŭdino, kaj ke ŝi kondukis lin al sia mastrino. Sed mi ne estas tiel malsaĝa.

GEORGO DANDIN. — Mi vin petas!

LUBIN. — Ne!

GEORGO DANDIN. — Mi donos al vi....

LUBIN. — Mendu-atendu!

SCENO OKA.

GEORGO DANDIN, *sola*.

Kun ĉi tiu malsaĝulo mi ne povis plenumi la penson, kiun mi havis. Sed la nova sciigo, kiu elglitis el lia buŝo, povas fari al mi tian saman servon; kaj, se la amisto estas en mia domo, tio donos al mi la eblon montriĝi prava en la okuloj de la gepatroj kaj plene ilin konvinki pri la senhonteco de ilia filino. La malbono en la afero estas nur tio, ke mi ne scias kiel min aranĝi, ke mi tiru profiton el tiu sciigo. Se mi eniros en mian domon, mi forkurigos la sentaŭgulon; kaj kion ajn malhonorigan por mi mi povus vidi per miaj propraj okuloj, oni tute ne kredos miajn vortojn, kaj oni diros al mi, ke mi fantazias. Aliflanke, se mi venigos la bogepatrojn, ne havante la certecon, ke ni trovos en mia domo la amiston, estos tiel same, kaj mi refalos en la malbonan staton de antaŭe. Eble mi povus senbrue esplori, ĉu li tie estas ankoraŭ? (*Rigardinte tra la truon de la seruro.*) Ha! ĉielo! Oni plu ne povas dubi, mi vidis lin tra la truon de la seruro. La sorto donas al mi la eblon konfuzi



miajn homojn; kaj, por kroni la tutan aventuron, ĝi alvenigas en la ĝusta momento la juĝantojn, kiujn mi bezonis.

SCENO NAŬA.

S<sup>ro</sup> DE SOTENVILLE, S<sup>ino</sup> DE SOTENVILLE, GEORGO DANDIN.

GEORGO DANDIN. — Nu, vi ne volis kredi al mi antaŭe, kaj via filino venkis; nun mi havas en la mano la eblecon vidigi al vi, kiel ŝi min aranĝas; kaj, dank' al Dio, mia malhonoro estas nun tiel klara, ke vi ne povos plu dubi pri ĝi.

S<sup>ro</sup> DE SOTENVILLE. — Kiel, mia bofilo! vi ĉiam ankoraŭ ripetas tion saman?

GEORGO DANDIN. — Jes, ĉiam ankoraŭ; kaj neniam mi havis portio tiom da kaŭzo, kiel nun.

S<sup>ino</sup> DE SOTENVILLE. — Vi denove volas turni al ni la kapon!

GEORGO DANDIN. — Jes, sinjorino; kaj kun mia kapo oni agas pli malbone.

S<sup>ro</sup> DE SOTENVILLE. — Ĉu vi neniam laciĝos tedi nin?

GEORGO DANDIN. — Ne, sed mi forte laciĝas esti moke trompata.

S<sup>ino</sup> DE SOTENVILLE. — Ĉu vi neniam volas liberigi vin de viaj strangaj pensoj?

GEORGO DANDIN. — Ne, sinjorino; sed mi tre dezirus liberigi min de edzino, kiu min malhonoras.

S<sup>ino</sup> DE SOTENVILLE. — Granda Dio! nia bofilo, lernu paroli konvene.

S<sup>ro</sup> DE SOTENVILLE. — Al la diablo! serĉu esprimojn malpli ofendajn.

GEORGO DANDIN. — Kiu perdas, tiu ne ridas.

S<sup>ino</sup> DE SOTENVILLE. — Memoru, ke vi edziĝis kun nobela fraŭlino.

GEORGO DANDIN. — Mi tion memoras sufiĉe, kaj mi ĉiam nur tro multe memoros tion.



S<sup>ro</sup> DE SOTENVILLE. — Se vi tion memoras, tiam penu paroli pri ŝi kun pli da respekto.

GEORGO DANDIN. — Sed kial ŝi pli ĝuste ne penas agi kun mi pli honeste? Kio! ĉar ŝi estas nobelino, ŝi devas havi la liberecon fari al mi, kion ŝi volas, kaj mi ne devas kuraĝi eĉ diri vorteton?

S<sup>ro</sup> DE SOTENVILLE. — Kio do fariĝis al vi, kaj kion vi povas diri? Ĉu vi ne vidis hodiaŭ matene, ke ŝi eĉ ne konis tiun, pri kiu vi parolis al mi?

GEORGO DANDIN. — Jes; sed kion vi diros, se mi nun vidigos al vi, ke la amisto estas kun ŝi?

S<sup>ino</sup> DE SOTENVILLE. — Kun ŝi?

GEORGO DANDIN. — Jes, kun ŝi, kaj en mia domo.

S<sup>ro</sup> DE SOTENVILLE. — En via domo?

GEORGO DANDIN. — Jes, en mia propra domo.

S<sup>ino</sup> DE SOTENVILLE. — Se ĝi estos tiel, ni estos por vi kontraŭ ŝi.

S<sup>ro</sup> DE SOTENVILLE. — Jes, la honoro de nia familio estas por ni pli kara ol ĉio en la mondo; kaj se vi diras la veron, ni malkonfesos en ŝi nian sangon kaj ni forlasos ŝin al via kolero.

GEORGO DANDIN. — Vi bezonas nur sekvi min.

S<sup>ino</sup> DE SOTENVILLE. — Gardu vin kontraŭ trompiĝo!

S<sup>ro</sup> DE SOTENVILLE. — Ne faru kiel antaŭe.

GEORGO DANDIN. — Mia Dio! Vi tuj vidos. (*Li montras en direkto al Klitandro, kiu elvenas kun Angeliko.*) Nu, rigardu, ĉu mi mensogis?

#### SCENO DEKA.

ANGELIKO, KLITANDRO, KLAŬDINO; S<sup>ro</sup> DE SOTENVILLE,  
S<sup>ino</sup> DE SOTENVILLE kaj GEORGO DANDIN *en la profundo de la scenejo.*

ANGELIKO, *al Klitandro.* — Adiaŭ! mi timas, ke oni povos vin ĉi tie surprizi, kaj mi devas min gardi.

KLITANDRO. — Promesu do al mi, sinjorino, ke mi povos paroli kun vi ĉi tiun nokton.



ANGELIKO. — Mi penos pri tio.

GEORGO DANDIN, *al gesinjoroj de Sotenville*. — Ni alproksimiĝu kviete de malantaŭe, kaj ni zorgu, ke oni nin ne vidu.

KLAŬDINO. — Ha, sinjorino! ĉio estas perdita! Jen estas viaj gepatroj en akompano de via edzo.

KLITANDRO. — Ho, ĉielo!

ANGELIKO, *mallaŭte al Klitandro kaj Klaŭdino*. — Tenu vin tute trankvile kaj lasu min agi. (*Laŭte al Klitandro*.) Kio! Vi kuraĝas ankoraŭ agi tiamaniere post la historio de antaŭe! kaj tiamaniere vi kaŝas viajn sentojn! Oni diras al mi, ke vi enamiĝis en min, kaj ke vi havas la intencon admonakiri min; mi atestas al vi mian indignon, kaj mi klare esprimas al vi miajn pensojn en alesto de ĉiuj; vi laŭte neas la aferon kaj donas al mi la vorton, ke vi havas nenian penson ofendi min; kaj tamen en tiu sama tago vi havas la arogantecon veni al mi vizite, diri al mi, ke vi min amas, rakonti al mi centon da malsaĝaj historioj, por konvinki min respondi al viaj malkonvenaĵoj, kvazaŭ mi estus tia virino, kiu povas rompi la ĵuron de fideleco, kiun mi donis al edzo, kaj iam forkliniĝi de la virteco, kiun instruis al mi miaj gepatroj. Se mia patro tion sciis, li bone instruus al vi provi tiajn entreprenojn! Sed honesta virino ne amas skandalon, tial mi gardas min ion diri al li; (*farinte signon al Klaŭdino, ke ŝi alportu bastonon*) kaj mi montros al vi, ke kvankam mi estas virino, mi havas sufiĉe da kuraĝo, por venĝi min mem por la ofendoj, kiujn oni faras al mi. Tio, kion vi faris, ne estas ago de nobelo, kaj tial mi traktos vin ankaŭ ne kiel nobelon. (*Angeliko prenas la bastonon kaj levas ĝin kontraŭ Klitandron, kiu forkliniĝas tiamaniere, ke la batoj falas sur Georgon Dandin.*)

KLITANDRO, *kriante, kvazaŭ li estus frapita*. — Aj! aj! aj! Kviete!



## SCENO DEK-UNUA.

S<sup>ro</sup> DE SOTENVILLE, S<sup>ino</sup> DE SOTENVILLE, ANGELIKO,  
GEORGO DANDIN, KLAŬDINO.

KLAŬDINO. — Forte, sinjorino, batu bone!

ANGELIKO, *ŝajnigante, ke ŝi parolas al Klitandro*. — Se vi ankoraŭ ion havas sur la koro, mi estas ĉi tie, por respondi al vi.

KLAŬDINO. — Rimarku ĝin bone, kun kiu vi ludas.

ANGELIKO, *ŝajnigante sin mirigita*. — Ha, mia patro, vi estas ĉi tie!

S<sup>ro</sup> DE SOTENVILLE. — Jes, mia filino; kaj mi vidas, ke koncerne la saĝon kaj kuraĝon vi montras vin inda ido de la domo de Sotenville. Venu ĉi tien, alproksimiĝu, ke mi vin ĉirkaŭprenu!

S<sup>ino</sup> DE SOTENVILLE. — Ankaŭ min ĉirkaŭprenu, mia filino. Ha, mi ploras de ĝojo, kaj mi rekonas mian sangon en la agoj, kiujn vi ĵus faris.

S<sup>ro</sup> DE SOTENVILLE. — Mia bofilo, kiel ravita vi devas esti! kaj kiel plena de dolĉeco certe estas por vi ĉi tiu okazaĵo! Vi havis justan kaŭzon, por maltrankviliĝi; sed viaj suspektoj montriĝas forpelitaj en la plej brilanta maniero.

S<sup>ino</sup> DE SOTENVILLE. — Sendube, nia bofilo, kaj vi devus nun esti la plej feliĉa el ĉiuj viroj.

KLAŬDINO. — Certe. Kia virino, kia virino! Vi estas tro feliĉa, ke vi ŝin posedas, kaj vi devus kisi la teron, kie ŝi paŝis.

GEORGO DANDIN, *al si mem*. — Ha, perfidulino!

S<sup>ro</sup> DE SOTENVILLE. — Kio ĝi estas, mia bofilo? Kial vi ne dankas iomete vian edzinon por la amo, kiun, kiel vi vidas, ŝi montras rilate vin?

ANGELIKO. — Ne, ne, mia patro, ne estas necese; li nenion ŝuldas al mi por tio, kion li ĵus vidis; kaj ĉio, kion mi faras en tiu rilato, estas nur pro amo al mi mem.

S<sup>ro</sup> DE SOTENVILLE. — Kien vi iras, mia filino?



ANGELIKO. — Mi foriras, mia patro, por ke mi ne estu devigata akcepti liajn komplimentojn.

KLAŬDINO, *al Georgo Dandin*. — Ŝi estas prava, ke ŝi koleras. Ŝi estas virino, kiu meritas esti adorata, kaj vi ŝin ne traktas, kiel vi devus.

GEORGO DANDIN, *al si mem*. — Kanajlo!

SCENO DEK-DUA.

S<sup>ro</sup> DE SOTENVILLE, S<sup>ino</sup> DE SOTENVILLE, GEORGO DANDIN.

S<sup>ro</sup> DE SOTENVILLE. — Ĝi estas malgranda resento de la historio le antaŭe, kaj ĝi pasos post iom da karesado, kiun vi faros al ŝi. Adiaŭ, mia bofilo; nun vi jam ne bezonas plu maltrankviliĝi. Iru, faru pacon inter vi kaj penu kvietigi ŝin per petado de pardono pro via flamiĝo.

S<sup>ino</sup> DE SOTENVILLE. — Vi devas konsideri, ke ŝi estas junulino, edukita en virteco, kaj ŝi ne kutimis, ke oni ŝin suspektu pri ia malkonvena ago. Adiaŭ. Ĝi faras al mi tre grandan ĝojon, ke mi nun vidas, ke viaj malkompreniĝoj estas finitaj, kaj ke ŝia konduto devas esti por vi tiel agrablega.

SCENO DEK-TRIA.

GEORGO DANDIN, *sola*.

Mi ne diras eĉ unu vorton, ĉar per parolado mi nenion gajnos. Neniam oni vidis tian malfeliĉan sorton, kiel mia. Jes, mi admiras mian malfeliĉon kaj la subtilan lertecon de mia kanajla edzino, kiu scias ĉiam montri sin prava kaj min malprava. Ĉu estas eble, ke mi ĉiam estos venkita de ŝi kaj la ŝajno ĉiam estos kontraŭ mi kaj mi neniam sukcesos elmontri la kulpecon de mia senhontulino? Ho, ĉielo, helpu miajn intencojn kaj donu al mi la favoron, ke mi povu vidigi al la homoj, ke oni min senhonorigas!



## ACTO TRIA

## SCENO UNUA.

KLITANDRO, LUBIN.

KLITANDRO. — Estas jam profunda nokto, kaj mi timas, ke eble estos jam tro malfrue. Mi tute ne povas min orienti. Lubin?

LUBIN. — Sinjoro?

KLITANDRO. — Ĉu per ĉi tie?

LUBIN. — Mi pensas, ke jes. Al la diablo! Kia malsaĝa nokto, ke ĝi estas tiel malluma!

KLITANDRO. — Certe ĝi estas malprava; sed, se de unu flanko ĝi malhelpas nin vidi, de la dua flanko ĝi malhelpas nin esti vidataj.

LUBIN. — Vi estas prava; la nokto ne estas tiel malprava. Mi volus scii, vi, sinjoro, estas ja tiel instruita, kial en la nokto neniam estas tago?

KLITANDRO. — Ĝi estas granda demando, kaj tre malfacila. Vi estas scivola, Lubin?

LUBIN. — Jes. Se mi estus lerninta, mi esplorus aferojn, kiujn oni neniam esploris.

KLITANDRO. — Mi kredas. Vi havas la mienon de homo, kiu havas spiriton subtilan kaj penetrantan.

LUBIN. — Tute vere. Ekzemple, mi komprenas la lingvon latinan, kvankam mi neniam ĝin lernis. Kiam mi antaŭ ne longe vidis sur iu granda pordo la surskribon « Collegium », mi tuj divenis, ke tio signifas kolegion.

KLITANDRO. — Mireginde! Vi scias do legi, Lubin?

LUBIN. — Jes, mi scias legi presitajn literojn; sed neniam mi sukcesis lernatingi legi skribitaĵon.

KLITANDRO. — Jen ni estas apud la domo. (*Frapinte la man-*



*platojn.)* Tio estas la signalo, pri kiu mi interkonsentis kun Klaŭdino.

LUBIN. — Vorton de honoro, ŝi estas knabino, kiu valoras monon, kaj mi ŝin amas per mia tuta koro.

KLITANDRO. — Ĝuste tial mi vin alkondukis kun mi, por ke vi pasigu kun ŝi la tempon babilante.

LUBIN. — Sinjoro, mi estas al vi...

KLITANDRO. — Ts! mi aŭdas ian brueton.

#### SCENO DUA.

ANGELIKO, KLAŬDINO, KLITANDRO, LUBIN.

ANGELIKO. — Klaŭdino?

KLAŬDINO. — Nu?

ANGELIKO. — Lasu la pordon iom malfermita.

KLAŬDINO. — Mi tion faris. (*Nokta sceno. La aktoroj serĉas sin reciproke en la mallumo.*)

KLITANDRO, *al Lubin.* — Ĝi estas ili. Ts!

ANGELIKO. — Ts!

LUBIN. — Ts!

KLAŬDINO. — Ts!

KLITANDRO, *al Klaŭdino, kiun li prenas por Angeliko.* — Sinjorino!

ANGELIKO, *al Lubin, kiun ŝi prenas por Klitandro.* — Kio?

LUBIN, *al Angeliko, kiun li prenas por Klaŭdino.* — Klaŭdino!

KLAŬDINO, *al Klitandro, kiun ŝi prenas por Lubin.* — Kio estas?

KLITANDRO, *al Klaŭdino, pensante, ke li parolas al Angeliko.* — Ha, sinjorino, kiom mi ĝojas!

LUBIN, *al Angeliko, pensante, ke li parolas al Klaŭdino.* — Klaŭdino, mia bona Klaŭdino!

KLAŬDINO, *al Klitandro.* — Kviete, sinjoro!

ANGELIKO, *al Lubin.* — Trankvile, Lubin!

KLITANDRO. — Ĉu ĝi estas vi, Klaŭdino?



KLAŬDINO. — Jes.

LUBIN. — Ĉu ĝi estas vi, sinjorino?

ANGELIKO. — Jes.

KLAŬDINO, *al Klitandro*. — Vi prenis unu por alia.

LUBIN, *al Angeliko*. — Honestan vorton, en la nokto oni nenion vidas.

ANGELIKO. — Ĉu ĝi ne estas vi, Klitandro?

KLITANDRO. — Jes, sinjorino.

ANGELIKO. — Mia edzo ronkas tute dece; kaj mi uzas tiun ĉi tempon, por esti kun vi.

KLITANDRO. — Ni serĉu ian lokon, por sidiĝi.

KLAŬDINO. — Tre bona konsilo. (*Angeliko, Klitandro kaj Klaŭdino sidiĝas en la profunda parto de la scenejo.*)

LUBIN, *serĉante Klaŭdinon*. — Klaŭdino, kie vi estas?

#### SCENO TRIA.

ANGELIKO, KLITANDRO kaj KLAŬDINO, *sidante en la profundo de la scenejo*; GEORGO DANDIN, *duone senvestigita*, LUBIN.

GEORGO DANDIN, *al si mem*. — Mi aŭdis, ke mia edzino iras mal-supren, tial mi rapide min vestis, por sekvi ŝin. Kien ŝi povis iri? Ĉu eble ŝi eliris?

LUBIN, *serĉante Klaŭdinon*. — Kie do vi estas, Klaŭdino? (*Prenante Georgon Dandin por Klaŭdino.*) Ha, jen vi estas! Vorton de honoro, via mastro estas bele aranĝita, kaj mi trovas tion tiel same gajiga, kiel la bastonbatoj de antaŭe, pri kiuj oni al mi rakontis. Via mastrino diras, ke li ronkas nun kiel mil diabloj; kaj li ne scias, ke sinjoro la vicgrafo kaj ŝi estas nun kune, dum li dormas. Mi volus scii, kion li nun songas. Ĝi estas treege ridinda. Sed kial do venis al li en la kapon esti ĵaluza pri sia edzino kaj voli, ke ŝi apartenu sole nur al li? Li estas arrogantulo, kaj sinjoro la vicgrafo faras al li tro da honoro. Vi nenion diras, Klaŭdino! Venu, ni ilin



sekvu, kaj donu al mi vian maneteton, ke mi ĝin kisu. Ha, kiel dolĉa ĝi estas! ŝajnas al mi, kvazaŭ mi manĝas konfitaĵon. (*Al Georgo Dandin, kiun li ĉiam ankoraŭ prenas por Klaŭdino, kaj kiu lin krude repuŝas.*) Al la diablo! kiel vi batas! Ĝi estas ja maneteto iom tre kruda!

GEORGO DANDIN. — Kiu iras?

LUBIN. — Neniu.

GEORGO DANDIN. — Li forkuras, informinte min pri la nova perfidaĵo de mia sentaŭgulino. Nu, estas necese, ke, ne perdante tempon, mi sendu alvoki ŝiajn gepatrojn, kaj ke ĉi tiu aventuro servu al mi, por liberiĝi de ŝi. Hola! Colin! Colin.

#### SCENO KVARA.

ANGELIKO, KLITANDRO, KLAŬDINO kaj LUBIN, *sidante en la profundo de la scenejo*; GEORGO DANDIN, COLIN.

COLIN, *tra la fenestro*. — Sinjoro?

GEORGO DANDIN. — Nu, rapide ĉi tien!

COLIN, *elsaltante tra la fenestro*. — Jen mi estas. Pli rapide oni ne povas.

GEORGO DANDIN. — Vi estas ĉi tie?

COLIN. — Jes, sinjoro. (*Dum Georgo Dandin iras serĉi Colin'on sur a flanko, kie li aŭdis lian voĉon, Colin transiras sur la duan flankon kaj tie endormiĝas.*)

GEORGO DANDIN, *turnante sin al la flanko, kie li supozas la ĉeestadon de Colin*. — Mallaŭte, parolu mallaŭte. Aŭskultu. Iru al miaj gepatroj kaj diru al ili, ke mi ilin petas tre insiste veni tuj ĉi tien. Ĉu vi aŭdas? He! Colin! Colin!

COLIN, *sur la dua flanko, revigliĝante*. — Sinjoro?

GEORGO DANDIN. — Kie, al la diablo, vi estas?

COLIN. — Ĉi tie.

GEORGO DANDIN. — Malbenita sentaŭgulo, kien li foriĝis! (*Dum*



*Georgo Dandin returniĝas al la flanko, kie li supozas, ke Colin restis, Colin, duone dormante, transiras al la dua flanko kaj tie endormiĝas.)* Mi diras al vi, ke vi iru tuj al miaj gebopatroj kaj diru al ili, ke mi ilin petegas veni ĉi tien tuje. Ĉu vi min komprenas? Respondu! Colin! Colin!

COLIN, *sur la dua flanko, revigliĝante.* — Sinjoro?

GEORGO DANDIN. — Tiu ĉi pendindulo min frenezigos! Venu al mi. (*Ili renkontiĝas kaj ambaŭ falas.*) Ha, la kanajlo! Li min kripligis! Kie do vi estas? Alproksimiĝu, ke mi donu al vi bonan porcion da batoj. Ŝajnas al mi, ke li forkuras de mi.

COLIN. — Kompreneble.

GEORGO DANDIN. — Ĉu vi venos?

COLIN. — Tute ne.

GEORGO DANDIN. — Venu, mi diras al vi.

COLIN. — Ne. Vi volas min bati.

GEORGO DANDIN. — Nu, bone, mi nenion faros al vi.

COLIN. — Certe?

GEORGO DANDIN. — Jes. Venu. Bone! (*Tirante Colin'on je a brako.*) Ĝi estas via feliĉo, ke mi vin bezonas. Iru rapide peti en mia nomo miajn bogepatrojn, ke ili venu ĉi tien plej baldaŭ kiel ili nur povas, kaj diru al ili, ke ĝi estas por afero ekstreme grava; kaj, se ili farus ian malfacilaĵon kaŭze de la malfrua horo, ne ĉesu ilin urĝi kaj bone komprenigi al ili, ke estas tre grave, ke ili venu, en kia ajn stato ili troviĝas. Nun vi min bone komprenas?

COLIN. — Jes, sinjoro.

GEORGO DANDIN. — Iru rapide kaj tuj revenu. (*Pensante, ke li estas sola.*) Kaj mi reeniros en mian domon kaj atendos, ĝis.... Sed mi aŭdas iun. Ĉu ĝi ne estas mia edzino? Mi aŭskultu kaj mi profitu de la mallumo. (*Georgo Dandin stariĝas apud la pordo de sia domo.*)



## SCENO KVINA.

ANGELIKO, KLITANDRO, KLAŬDINO, LUBIN, GEORGO DANDIN.

ANGELIKO, *al Klitandro*. — Adiaŭ ! Estas tempo disiri.

KLITANDRO. — Kio ? tiel frue ?

ANGELIKO. — Ni sufiĉe longe parolis kune.

KLITANDRO. — Ha, sinjorino ! Ĉu mi povas paroli sufiĉe kun vi kaj trovi en tiom malmulte da tempo ĉiujn vortojn, kiujn mi bezonas ? Mi bezonus tutajn tagojn, por bone esprimi al vi ĉion, kion mi sentas ; kaj mi ne diris al vi ankoraŭ eĉ la plej malgrandan parton de tio, kion mi havas por diri al vi.

ANGELIKO. — Ni aŭdos plue alian fojon.

KLITANDRO. — Ho ve ! Per kia bato vi traboras al mi la animon, kiam vi parolas pri via foriro ! kaj en kiom da malĝojo vi nun min lasas !

ANGELIKO. — Ni trovos la eblon, por nin revidi.

KLITANDRO. — Jes ; sed mi pensas pri tio, ke forlasante min, vi iras al edzo. Tiu ĉi penso min mortigas ; kaj la privilegioj, kiujn havas la edzoj, estas teruraj por amanto, kiu vere amas.

ANGELIKO. — Ĉu vi estas tiel malforta, ke vi havas tian maltrankvilecon ? kaj ĉu vi pensas, ke oni estas kapabla ami certajn edzojn ? Oni ilin prenas, ĉar oni nenion povas fari kontraŭ tio, kaj ĉar oni dependas de siaj gepatroj, kiuj rigardas nur la havon ; sed oni scias ankaŭ agi kun ili juste, kaj oni tute ne havas la intencon ŝati ilin pli alte, ol kiom ili meritas.

GEORGO DANDIN, *al si mem*. — Jen niaj kanajlaj edzinoj !

KLITANDRO. — Ha, oni devas konfesi, ke tiu, kiun oni donis al vi, tre malmulte meritas la honoron, kiun li ricevis ! kaj ĝi estas tre stranga afero, tiu kunigo, kiun oni faris inter tia persono, kiel vi, kaj tia viro, kiel li !



GEORGO DANDIN, *al si mem.* — Malfeliĉaj edzoj! jen kiel oni vin traktas!

KLITANDRO. — Vi meritas tre certe tute alian destinon, kaj la ĉielo tute vin ne kreis, por esti edzino de kampulo.

GEORGO DANDIN. — Se la ĉielo volus, ke ŝi estu via! vi baldaŭ parolus alie. Mi eniru; mi havas sufiĉe da tio. (*Georgo Dandin, enirinte, fermas la pordon de interne.*)

## SCENO SESA.

ANGELIKO, KLITANDRO, KLAŬDINO, LUBIN.

KLAŬDINO. — Sinjorino, se vi havas ankoraŭ ion malbonan por diri pri via edzo, vi rapidu, ĉar estas jam malfrue.

KLITANDRO. — Ha, Klaŭdino, vi estas kruela!

ANGELIKO, *al Klitandro.* — Ŝi estas prava. Ni disiĝu.

KLITANDRO. — Mi devas do decidiĝi, ĉar vi tiel volas. Sed almenaŭ mi vin petegas, bedaŭru min iom pri la malbonaj horoj, kiujn mi nun pasigos.

ANGELIKO. — Adiaŭ!

LUBIN. — Kie vi estas, Klaŭdino? mi volas diri al vi bonan nokton.

KLAŬDINO. — Iru, iru, mi akceptas ĝin de malproksime, kaj mi resendas al vi tion saman.

## SCENO SEPA.

ANGELIKO, KLAŬDINO.

ANGELIKO. — Ni eniru senbrue.

KLAŬDINO. — La pordo fermiĝis.

ANGELIKO. — Mi havas la ĉefan ŝlosilon.

KLAŬDINO. — Malfermu do mallaŭte.

ANGELIKO. — Oni ŝlosis de interne; kaj mi ne scias, kion ni faros.



KLAŬDINO. — Veku la serviston, kiu kuŝas ĉi tie.

ANGELIKO. — Colin! Colin! Colin!

SCENO OKA.

GEORGO DANDIN, ANGELIKO, KLAŬDINO.

GEORGO DANDIN, *ĉe la fenestro*. — Colin! Colin! Ha, mi vin kaptas ĉi tie, sinjorino mia edzino! kaj vi faras ekskursojn, dum mi dormas! Mi tre ĝojas pri tio, kaj estas al mi agrable vidi vin ekstere en tia malfrua horo.

ANGELIKO. — Nu, kia granda malbono ĝi do estas, se oni prenas en la nokto iom da freŝa aero?

GEORGO DANDIN. — Jes, jes; bona horo, por preni freŝan aeron! ĝi estis pli ĝuste varmo, sinjorino friponino; kaj ni scias la tutan intrigon de la rendezuo kaj de la sinjoreto. Ni aŭdis vian delikatan interparoladon kaj la belajn laŭdajn vortojn, kiujn vi diris pri mi unu al la alia. Sed mi konsoliĝas per tio, ke mi tuj estos vengita, kaj ke viaj gepatroj konvinkiĝos nun pri la justeco de miaj plendoj kaj pri la malmoraleco de via konduto. Mi sendis peti ilin ĉi tien, kaj baldaŭ ili estos ĉi tie.

ANGELIKO, *al si mem*. — Ha, ĉielo!

KLAŬDINO. — Sinjorino!

GEORGO DANDIN. — Jen estas frapo, sendube, kiun vi ne atendis. Nun mi triumfas; kaj mi havas, per kio malaltigi vian fierecon kaj detrui viajn artifikaĵojn. Ĝis nun vi mokis miajn akuzojn, blindigis viajn gepatrojn kaj beligis viajn trompojn. Vane mi vidis, vane mi parolis, via lerteco ĉiam venkis mian rajtecon, kaj ĉiam vi trovis rimedon, por esti prava; sed ĉi tiun fojon, dank' al Dio, la aferoj klariĝos kaj via senhonteco estos plene elmontrita.

ANGELIKO. — He, mi vin petas, lasu malfermi al mi la pordon.

GEORGO DANDIN. — Ne, ne! ni devas atendi la venon de tiuj,



kiujn mi invitis, kaj mi volas, ke ili vin trovu ekstere en la nuna bela horo. Atendante ilian venon, penu, se vi volas, serĉi en via kapo ian novan artifikon, por eltiriĝi el ĉi tiu afero! penu elpensi ian rimedon, por prezenti en bela lumo vian vagadon; trovi ian belan ruzajon, por elturniĝi kaj aperi senkulpa; ian verŝajnigan pretekston por via nokta migrado, ekzemple, ke vi iris helpi ian amikinon en akuŝo.

ANGELIKO. — Ne; mi ne intencas ion kaŝi antaŭ vi. Mi ne volas min defendi nek malkonfesi antaŭ vi la aferojn, ĉar vi ja ĉion scias.

GEORGO DANDIN. — Ĉar vi bone vidas, ke ĉiuj rimedoj estas fermitaj por vi, kaj ke en ĉi tiu afero vi ne povus elpensi tiajn senkulpigojn, kies malverecon mi ne povus elmontri.

ANGELIKO. — Jes, mi konfesas, ke mi estas malprava, kaj ke vi havas kaŭzon, por plendi. Sed mi vin petas, faru al mi la favoron, ne elmetu min nun al la kolero de miaj gepatroj, kaj lasu rapide malfermi al mi.

GEORGO DANDIN. — Mi tuj obeos.

ANGELIKO. — Ho, mia bona edzeto, mi vin petegas!

GEORGO DANDIN. — Ho, mia bona edzeto! Mi estas nun via bona edzeto, ĉar vi sentas, ke vi estas kaptita. Mi tre ĝojas pri tio; neniam antaŭe venis al vi en la kapon diri al mi tiajn dolĉajn vortojn.

ANGELIKO. — Aŭdu, mi promesas al vi, ke mi neniam plu donos al vi kaŭzon por plendi, kaj ke mi...

GEORGO DANDIN. — Nenio helpas. Mi ne volas ellasi el la manoj ĉi tiun aventuron, kaj estas grave por mi, ke oni unu fojon ricevu fundan klarigon pri via konduto.

ANGELIKO. — Mi petegas, lasu min paroli kun vi. Mi petas de vi unu minuton da aŭskultado.

GEORGO DANDIN. — Nu, kio?

ANGELIKO. — Estas vero, ke mi pekis, mi ĝin konfesas al vi



ankoraŭ unu fojon, kaj via kolero estas justa; la tempon, kiam vi dormis, mi uzis, por eliri, kaj tiu ĉi eliro estis rendevuo, kiun mi donis al la persono, pri kiu vi parolis. Tamen ĝi estas ja agoj, kiujn vi devas pardoni al mia ago, forlogiĝoj de juna persono, kiu ankoraŭ nenion vidis kaj nur ĵus eniras en la mondon; libereco, al kiu oni sin fordonas, pensante ĉe tio nenion malbonan, kaj kiu sendube en la fundo havas nenion...

GEORGO DANDIN. — Jes, vi tion diras, kaj ĝi apartenas al tiuj aferoj, kiuj bezonas, ke oni ilin pie kredu.

ANGELIKO. — Mi tute ne volas diri per tio, ke mi estas senkulpa antaŭ vi, kaj mi vin nur petas, ke vi forgesu ofendon, pri kiu mi el mia tuta koro petas vian pardonon, kaj ke vi antaŭliberigu min de tiu renkontiĝo kaj de la ĉagreno, kiun povus kaŭzi al mi la malagrablaj riproĉoj de miaj gepatroj. Se vi grandanime donos al mi la favoron, pri kiu mi vin petas, tiam tiu ĉi ŝuldiga faro, tiu ĉi boneco, kiun vi montros al mi, akiros min por vi plene; ĝi tuŝos profunde mian koron kaj naskos tie por vi tion, kion la tuta potenco de miaj gepatroj kaj la ligiloj de la edzeco ne povis tie atingi. Per unu vorto, ĝi estos la kaŭzo, ke mi rifuzos ĉiun amindumadon, kaj mi havos sindonecon nur por vi. Jes, mi donas al vi mian vorton, ke vi havos en mi de nun la plej bonan edzinon en la mondo, kiu montros al vi tiom da amo, tiom da amo, ke vi estos tute kontenta.

GEORGO DANDIN. — Ha, krokodilo, kiu flatas la homojn, por ilin sufoki!

ANGELIKO. — Donu al mi tiun favoron.

GEORGO DANDIN. — Nenio estos. Mi estas nepetegebla.

ANGELIKO. — Montru vin grandanima.

GEORGO DANDIN. — Ne.

ANGELIKO. — Kompatu min!

GEORGO DANDIN. — Tute ne.

ANGELIKO. — Mi vin petegas per mia tuta koro.



GEORGO DANDIN. — Ne, ne, ne! Mi volas, ke oni ĉesu erari pri vi kaj via konfuzo estu videbla por ĉiuj.

ANGELIKO. — Nu, bone! Se vi elmetas min al la malespero, mi vin avertas, ke virino en tia stato estas kapabla je ĉio, kaj mi faros ion, pri kio vi pentos.

GEORGO DANDIN. — Kaj kion vi faros, mia sinjorino?

ANGELIKO. — Mia koro min pelos al la plej ekstremaj decidoj; kaj per ĉi tiu tranĉilo, kiun vi vidas, mi tuj min mortigos.

GEORGO DANDIN. — Ha, ha! Perfekte!

ANGELIKO. — Por vi ĝi ne estos tiel perfekta, kiel vi pensas. Ĉiuj scias pri nia malpaco kaj la konstantajn ĉagrenojn, kiujn vi faras al mi. Kiam oni trovos min mortigita, neniuj dubos pri tio, ke min mortigis ĝuste vi; kaj miaj gepatroj certe ne lasos tiun morton nepunita, kaj ili venigos sur vian personon ĉian punon, kiun povos liveri al ili la decidoj de la juĝo kaj la ardeco de iliaj sentoj. Tiamaniere mi trovos rimedon, por venĝi min kontraŭ vi; kaj mi ne estas la unua, kiu uzas tiamanieran venĝon kaj kiu ne timas eĉ sin mortigi, por pereigi tiujn, kiuj estas tiel kruelaj, ke ili nin puŝas al la ekstremaĵo.

GEORGO DANDIN. — Mi estas via obeema servanto. Oni nun jam ne pensas plu pri mortigado de si mem; la modo pri tio pasis jam de longe.

ANGELIKO. — Ĝi estas afero, pri kiu vi povas esti tute certa; kaj se vi persistos en via rifuzo, se vi ne lasos malfermi al mi, mi ĵuras al vi, ke tuj mi vidigos al vi, ĝis kie povas iri la decidemeco de persono, kiun oni elmetas al malespero.

GEORGO DANDIN. — Vantaĵo, vantaĵo! Tio tute ne faras al mi ian timon.

ANGELIKO. — Nu, bone! Ĉar ĝi estas necesa, jen kio kontentigos nin ambaŭ kaj montros, ĉu mi ŝercas. (*Farinte kvazaŭ ŝi sin mortigas.*) Ha, ĝi fariĝis! La ĉielo donu, ke mia morto estu venĝita tiel, kiel mi deziras, kaj ke tiu, kiu estas la kaŭzo de tio, ricevu justan punon por lia krueleco kontraŭ mi!



GEORGO DANDIN. — Oho! Ĉu ŝi efektive estus tiel malbona kaj mortigus sin, por ke oni min pendigu? Ni prenu peceton da kandelolo, por rigardi.

SCENO NAŬA.

ANGELIKO, KLAŬDINO.

ANGELIKO, *al Klaŭdino*. — Ts! silente! Ni tuj stariĝu ĉe la ambaŭ flankoj de la pordo.

SCENO DEKA.

ANGELIKO kaj KLAŬDINO, *enirante en la domon en la momento, kiam Georgo Dandin el ĝi eliras, kaj ŝlosante la pordon de interne; GEORGO DANDIN tenante kandelon en la mano.*

GEORGO DANDIN. — Ĉu la malboneco de virino efektive povus atingi tian gradon? (*Sola, rigardinte ĉien ĉirkaŭe.*) Neniu estas! Ha, mi tion suspektis; la pendindulino foriris, vidante ke ŝi nenion atingos de mi, nek per petoj, nek per minacoj. Des pli bone! tio faros ŝiajn aferojn ankoraŭ pli malbonaj; kaj la gepatroj, kiuj baldaŭ venos, vidos per tio ŝian krimon ankoraŭ pli bone. (*Tuŝinte la pordon de sia domo por eniri.*) Ha, ha! la pordo ŝlosiĝis! Hola! Ĥe! Iu venu! Oni tuj malfermu al mi!

SCENO DEKUNUA.

ANGELIKO kaj KLAŬDINO *ĉe la fenestro*; GEORGO DANDIN.

ANGELIKO. — Kio! ĝi estas vi! De kie vi venas, sentaŭgulo? Ĉu nun estas tempo, por reveni hejmen, kiam preskaŭ jam tagiĝas? Tia estas la konduto de honesta edzo?

KLAŬDINO. — Ĉu estas bele drinki la tutan nokton kaj lasi tia-



maniere en la daŭro de tuta nokto malfeliĉan junan edzinon en la domo?

GEORGO DANDIN — Kio! vi...

ANGELIKO. — Iru, iru, perfidulo, mi estas laca de via malĉasteco, kaj mi plendos, ne atendente plu, al miaj gepatroj.

GEORGO DANDIN. — Kio! Vi ankoraŭ kuraĝas...

SCENO DEKDUA.

S<sup>ro</sup> DE SOTENVILLE kaj S<sup>ino</sup> DE SOTENVILLE en noktaj vestoj; COLIN, portante lanternon; ANGELIKO kaj KLAŬDINO, ĉe la fenestro; GEORGO DANDIN.

ANGELIKO, al *gesinjoroj de Sotenville*. — Ho, venu, mi vin petegas, venu doni al mi venĝon por la plej granda aroganteco de la flanko de edzo, al kiu la vino kaj ĵaluzeco en tia grado konfuzis la cerbon, ke li plu ne scias, nek kion li diras, nek kion li faras, kaj kiu mem sendis inviti vin, ke vi estu atestantoj de la plej granda sensencaĵo, pri kiu oni iam aŭdis. Jen li revenas, kiel vi vidas, lasinte atendi sin la tutan nokton; kaj se vi volos lin aŭskulti, li diros al vi, ke li havas kontraŭ mi la plej grandajn plendojn; ke dum li dormis, mi forŝteliĝis de li, por iri vagi, kaj cent aliajn samspecajn historiojn, kiujn li songis.

GEORGO DANDIN, *al si mem*. — Ha, kia malica kanajlo!

KLAŬDINO. — Jes, li volis kredigi al ni, ke li estis en la domo kaj ni estis ekstere; kaj ĉi tiun frenezaĵon oni ne povas elpeli al li el la kapo.

S<sup>ro</sup> DE SOTENVILLE. — Kio! Kion tio signifas?

S<sup>ino</sup> DE SOTENVILLE. — Kia furioza senhonteco, sendi voki nin!

GEORGO DANDIN. — Neniam...

ANGELIKO. — Ne, mia patro, mi ne povas plu toleri tiaspecan edzon; mia pacienco estas tute elĉerpita; kaj ĵus li diris al mi centon da plej ofendaj vortoj.



S<sup>ro</sup> DE SOTENVILLE, *al Georgo Dandin*. — Al la diablo! vi estas malnobla homo!

KLAŬDINO. — Estas terure, kiam oni vidas, ke malfeliĉan junan virinon oni traktas en tia maniero, kaj tio krias pri venĝo al la ĉielo.

GEORGO DANDIN. — Ĉu oni povas...

S<sup>ro</sup> DE SOTENVILLE. — Iru, vi devus morti de honto.

GEORGO DANDIN. — Lasu min diri al vi du vortojn.

ANGELIKO. — Vi nur aŭskultu, li rakontos al vi belajn historiojn.

GEORGO DANDIN, *al si mem*. — Mi enfalas en malesperon.

KLAŬDINO. — Li tiom multe drinkis, ke oni ne povas longe stari apud li; la vinaodoro, kiun li elspiras, atingas ĝis ni.

GEORGO DANDIN. — Sinjoro bopatro, mi vin petegas...

S<sup>ro</sup> DE SOTENVILLE. — Forŝoviĝu; vi malbonodoras vinon per via tuta buŝo.

GEORGO DANDIN. — Sinjorino, mi vin petas....

S<sup>ino</sup> DE SOTENVILLE. — Fi, ne alproksimiĝu al mi, via spirado estas pesta.

GEORGO DANDIN, *al S<sup>ino</sup> de Sotenville*. — Toleru, ke mi....

S<sup>ro</sup> DE SOTENVILLE. — Foriĝu, mi diras al vi; oni ne povas toleri vin.

GEORGO DANDIN, *al S<sup>ro</sup> de Sotenville*. — Mi petegas vin, permesu, ke...

S<sup>ino</sup> DE SOTENVILLE. — Hu, vi min svenigas. Parolu de malproksime, se vi volas.

GEORGO DANDIN. — Nu, bone! Jes, mi parolos de malproksime. Mi ĵuras al vi, ke mi eĉ ne moviĝis el mia domo, sed nur ŝi eliris.

ANGELIKO. — Ĉu ne estas tiel, kiel mi diris al vi?

KLAŬDINO. — Vi vidas, kian verŝajnecon ĝi havas.

S<sup>ro</sup> DE SOTENVILLE, *al Georgo Dandin*. — Iru, vi mokas la homojn. Venu ĉi tien malsupren, mia filino.



## SCENO DEKTRIA.

S<sup>ro</sup> DE SOTENVILLE, S<sup>ino</sup> DE SOTENVILLE,  
GEORGO DANDIN, COLIN.

GEORGO DANDIN. — Mi atestigas la ĉielon, ke mi estis en la domo kaj...

S<sup>ro</sup> DE SOTENVILLE. — Silentu! ĝi estas netolerebla sensencaĵo

GEORGO DANDIN. — La tondro min tuj mortigu, se...

S<sup>ro</sup> DE SOTENVILLE. — Ne turnu al ni plu la kapon, sed penu peti pardonon de via edzino.

GEORGO DANDIN. — Mi! peti pardonon?

S<sup>ro</sup> DE SOTENVILLE. — Jes, pardonon, kaj tuj!

GEORGO DANDIN. — Kio! mi...

S<sup>ro</sup> DE SOTENVILLE. — Al la diablo! Se vi kontraŭparolos al mi, mi vin instruos, kio estas moki nin.

GEORGO DANDIN. — Ha, Georgo Dandin!

## SCENO DEKKVARA.

S<sup>ro</sup> DE SOTENVILLE, S<sup>ino</sup> DE SOTENVILLE, ANGELIKO,  
GEORGO DANDIN, KLAŬDINO, COLIN.

S<sup>ro</sup> DE SOTENVILLE. — Venu ĉi tien, mia filino, por ke via edzo petu de vi pardonon.

ANGELIKO. — Mi! pardoni al li ĉion, kion li diris al mi? Ne, mia patro, mi neniel povas decidiĝi al tio; kaj mi petas vin disigi min de edzo, kun kiu mi plu ne povus vivi.

KLAŬDINO. — Kiel oni povus ĉion elporti!

S<sup>ro</sup> DE SOTENVILLE. — Mia filino, tiaj disiĝoj ne povas esti farataj sen granda skandalo; kaj vi devas montri vin pli saĝa ol li kaj pacienci ankoraŭ ĉi tiun fojon.

ANGELIKO. — Kiel! pacienci post tiaj indignindaĵoj! Ne, mia patro, tian aferon mi ne povas konsenti.



S<sup>ro</sup> DE SOTENVILLE. — Estas necese, mia filino, kaj mi tion al vi ordonas.

ANGELIKO. — Ĉi tiu vorto fermas al mi la buŝon, kaj vi havas super mi senliman potencon.

KLAŬDINO. — Kia bonkoreco!

ANGELIKO. — Estas ĉagrene, se oni estas devigata forgesi tiajn ofendojn; sed kian ajn perforton mi devas fari al mi, mi devas vin obei.

KLAŬDINO. — Malfeliĉa ŝafeto!

S<sup>ro</sup> DE SOTENVILLE, *al Angeliko*. — Alproksimiĝu!

ANGELIKO. — Ĉio, kion vi devigas min fari, servos al nenio; kaj vi vidos, ke morgaŭ ĉio denove rekomenciĝos.

S<sup>ro</sup> DE SOTENVILLE. — Ni faros ordon. (*Al Georgo Dandin.*) Venu, genuiĝu!

GEORGO DANDIN. — Genuiĝi?

S<sup>ro</sup> DE SOTENVILLE. — Jes, genuiĝu, kaj tuj!

GEORGO DANDIN, *genu, kun kandelo en la mano. Al si mem.* — Ho, ĉielo! (*Al S<sup>ro</sup> de Sotenville.*) Kion mi devas diri?

S<sup>ro</sup> DE SOTENVILLE. — Sinjorino, mi petas vin pardoni al mi...

GEORGO DANDIN. — Sinjorino, mi petas vin pardoni al mi...

S<sup>ro</sup> DE SOTENVILLE. — La sensencaĵon, kiun mi faris...

GEORGO DANDIN. — La sensencaĵon, kiun mi faris... (*Al si mem.*) edziĝante kun vi.

S<sup>ro</sup> DE SOTENVILLE. — Kaj mi promesas al vi pli bone konduti en la estonteco.

GEORGO DANDIN. — Kaj mi promesas al vi pli bone konduti en la estonteco.

S<sup>ro</sup> DE SOTENVILLE, *al Georgo Dandin*. — Gardu vin, kaj sciu, ke ĝi estas la lasta el viaj arogantaĵoj, kiun ni toleras.

S<sup>ino</sup> DE SOTENVILLE. — Per Dio! se vi ankoraŭ unu fojon permesos al vi, oni instruos al vi la respekton, kiun vi ŝuldas al via edzino kaj al tiuj, de kiuj ŝi devenas.

S<sup>ro</sup> DE SOTENVILLE. — Jen jam tagiĝas. Adiaŭ! (*Al Georgo Dandin.*)



Iru en vian domon kaj penu esti bonkonduta. (*Al S<sup>ino</sup> de Sotenville.*)  
Kaj ni, mia koro, ni iru enlitigi.

SCENO DEKVINA.

GEORGO DANDIN, *sola*.

Ha, mi nun rezignacias, ĉar mi vidas plu nenian rimedon. Kiam oni, simile al mi, edziĝis kun malbona virino, tiam la plej bona, kion oni povas fari, estas iri ĵeti sin en la akvon, la kapon antaŭen.







**ESPERANTA VERKARO**







### Konsiloj pri la mendado de libroj

*Mendojn la Librairie Centrale Esperantisto povas servi nur se ili estas antaŭpagitaj.*

*Al la prezoj anoncitaj devas esti aldonita la proksimuma valoro de la sendokostoj—kalkulata grandigante la prezojn de :*

*por Francujo 15 % + Fr. Fr. 0, 60 por ĉiu mendo.*

*por aliaj landoj 30 % + Fr. Fr. 1, 50 por ĉiu mendo.*

*Akceptataj estas : ĉekoj pageblaj en Parizo — Banbiletoj en franca mono aŭ mono de grandaj ŝtatoj — Respondkuponoj de U. E. A. — Kaj Postmandatoj.*

### Por la Instruado :

**Franca gramatiko por Esperantistoj**, de PAUL BOULET.

Unu volumo in-16, 86-paĝa. . . . . 3 »

**Instruado de Esperanto per Bildaroj.**

Unu volumeto in-16, 16-paĝa, kun kolorigitaj bildoj. . . . . 1 50

### Kolekto de la Akademio :

**Oficiala Klasika Libro (Franca, Angla kaj Germana partoj)**, de E. GROS-JEAN-MAUPIN, entenanta krom la dek ses reguloj de la gramatiko : 1<sup>o</sup> la francan, anglan kaj germanan zorge korektitajn kaj kompletigitajn tradukojn de ĉiuj oficialaj radikoj, esceptante la radikojn, kiuj estas sufiĉe internaciaj por ne bezoni tradukon; — 2<sup>o</sup> la internaciajn radikojn, kiuj, eĉ estante netradukitaj, estas ĝenerale kompreneblaj por eŭroplingvanoj; — 3<sup>o</sup> la esperantlingvan difinon de la netradukitaj radikoj, kiuj ne troviĝas en la bonega Vortaro de Kabe; — 4<sup>o</sup> rimarkojn koncernantajn la franca-angla kaj germanalingvanojn.

Unu libro 128-paĝa. . . . . 3 60

**Oficiala Klasika Libro (Itala, Hispana kaj Portugala partoj)**, de S<sup>ro</sup> MIGLIORINI, MAZZOLINI kaj LA COLLA; Prof. INGLANA: Prof. BACKEUSER kaj S<sup>ro</sup> SALDANHA CARREIRA.

Unu libro 118-paĝa . . . . . 3 60

**Korekto de eraraj tradukoj en « Universala Vortaro »** (kun aprobo de la Lingva Komitato).

FRANCA PARTO, de TH. CART. Unu libro 4-paĝa. Fr. . . . . fr. 0 50

ANGLA PARTO, ĉe British Esperanto Association, 17, Hart street, London W. C. 1.

Price . . . . . 3 d.

GERMANA PARTO, ĉe Ellersiek, Wilms-str. 5, Berlin S. W. 61. Preis. 0.30 M.

POLA PARTO kaj RUSA PARTO, ĉe Ellersiek, Berlin. Preis . . . . . 0 30 M.

**Vortaro de la oficialaj Radikoj de Esperanto**, laŭ « Universala Vortaro » kaj la tri Oficialaj Aldonoj, de Th. CART.

Unu libro 32-paĝa. . . . . 1 »

Oni aldonu la sendokostojn al la supre anoncitaj prezoj.



**Vortaroj kaj Teknikaj Verkoj.**

**Vortaro de Esperanto**, de KABE.

Unu volumo in-8, kartonbindita, 175-paĝa. . . . . Francaj fr. 10 »

**Konsilaro por la farado de la Sciencaj kaj Teknikaj vortoj**, de ROLLET DE L'ISLE.

Unu granda volumo 78-paĝa . . . . . 10 »

**Vocabulaire Esperanto-Français des mots spéciaux à la philatélie**, avec modèles de lettres, de CH. LEMAIRE.

Unu volumo in-8, 20-paĝa . . . . . 1 50

**Vade-Mecum de Internacia Farmacio**, de C. ROUSSEAU.

Unu volumo in-8, tolbindita, 288-paĝa. . . . . 25 »

**Inicado Matematika**, de C.-A. LAISANT, trad. J. CAMESCASSE.

Unu volumo in-16, 172-paĝa. . . . . 2 »

**Teatraĵoj :**

**Advokato Patelin**, unuakta komedio de BRUEYS kaj PALAPRAT, tradukis el franca lingvo J. EVROT.

Unu volumo in-16, 42-paĝa . . . . . 2 »

**Kara panjo**, komedieto de WALTER GORDON, el angla lingvo tradukis GEGO.

Unu volumo in-8, 36-paĝa. . . . . 2 »

**Kial ili estas famaj**, monologo de GEORGES FEYDEAU, tradukita el franca lingvo kaj plilongigita, de FERNAND DORÉ.

Unu volumo in-16, 12-paĝa. . . . . 1 20

**La Barbiro de Sevilla**, kvarakta komedio de BEAUMARCHAIS, tradukis el franca lingvo SAM. MEYER.

Unu volumo in-16, 64-paĝa. . . . . 2 50

**La Vangfrapo**, unuakta komedio de ABRAHAM DREYFUS, tradukis el franca lingvo S. SAR.

Unu volumo in-16, 52-paĝa. . . . . 2 50

**Sokrato**, triakta dramo de CH. RICHET, tradukis el franca lingvo JEAN COUTEAUX.

Unu volumo in-8, 100-paĝa. . . . . 7 50

**Solo de fluto**, monologo de PAUL BILHAUD, tradukis el franca lingvo FERNAND DORÉ.

Unu volumo in-8, 12-paĝa . . . . . 1 »

**Tri monologoj**, el franca lingvo tradukis PAUL BOULET.

Unu volumo in-8, 14-paĝa. . . . . 1 20

**Verdkata Testamento**, amuziaj versaĵoj kaj deklamaĵoj, de R. SHWARTZ.

Unu libro 12×16 cm., 128-paĝa. . . . . 10 »

La supraj prezoj povas varii, nur tiuj anoncitaj en la **Plena Katalogo** de la Esperantista Centra Librejo, estas ĉiam oficialaj.

Oni aldonu la sendokostojn al supre la anoncitaj prezoj.



***Kolekto de « LA REVUO » :***

- Aspazio**, tragedio en kvin aktoj, de A. SVJENTOŬOVSKI el pola lingvo tradukis D<sup>ro</sup> LEONO ZAMENHOF.  
Unu volumo in-8, 157-paĝa. . . . . Francaj fr. 9 »
- Halka**, opero en kvar aktoj, teksto de W. WOLSKI, el pola lingvo tradukis ANTONI GRABOWSKI.  
Unu volumo in-8, 38-paĝa. . . . . 5 »
- Kaatje**, kvarakta teatraĵo de PAUL SPAAK, el flandra lingvo tradukis D<sup>ro</sup> W. VAN DER BIEST.  
Unu volumo in-8, 111-paĝa . . . . . 7 50
- La Faraono**, romano de PRUS, tradukis D<sup>ro</sup> K. BEIN.  
Tri volumoj in-8, 194-238-191-paĝaj (kune) . . . . . 30 »
- La esploroj faritaj de scienculoj, la eltrovo de antikvaj monumentoj, kaj precipe la deĉifrado de l' hieroglifaj skribaĵoj, revivigis iamaniero, post kvardek jarcentoj, la enterigitan gloron de l' Faraonaj tempoj.  
Dank'al tiuj scienculoj, la historio, moroj, kaj eĉ la intima vivado de tiu fama popolo, estas nun de ni konataj : nur restis, ke iu genia romanverkisto kunarangu kaj konkretigu la historiajn faktojn por transporti nin en tiun misterplenan epokon.  
Tion genie faris la glora verkisto Prus, kaj lian verkon genie tradukis la nemalpli glora esperanta stilisto : K. Bein (Kabe).
- La Rompantoj**, kvin monologoj verkitaj de F. PUJULA-VALJES.  
Unu volumo in-8, 44-paĝa, kun ilustraĵoj . . . . . 4 »
- Mistero de Doloro**, dramo de ADRIÀ GUAL, el kataluna lingvo tradukis F. PUJULA-VALJES.  
Unu volumo in-8, 96-paĝa. . . . . 6 »

***Literaturo :***

- Anni kaj Montmartro**, romano de RAYMOND SCHWARTZ.  
Unu libro 12x16 cm, 128-paĝa. . . . . 12 »
- Du Rakontoj**, de D. DE ROTHAN  
Unu volumo in-8, 60-paĝa. . . . . 2 50
- Grasa Lignaĵisto**, firenza novelo, trad. G. CHAVET.  
Unu volumo in-8, 24-paĝa. . . . . 1 »
- La fundo de l' mizero**, de VACLAV SIEROŠEVSKI, el pola lingvo tradukis D<sup>ro</sup> KABE.  
Unu volumo in-16, 88-paĝa . . . . . 2 50
- La interrompita kanto**, de S<sup>ro</sup> ORZESZKO, el pola lingvo tradukis D<sup>ro</sup> KABE.  
Unu volumo in-16, 79-paĝa. . . . . 2 50
- Prozo Ridetanta**, noveloj originale verkitaj de RAYMOND SCHWARTZ.  
Unu libro 12x16 cm., 176-paĝa. . . . . 14 »
- Rakontoj al mia belulino**, de JEAN BACH-SISLEY el la franca lingvo tradukis L. TOUCHÉBEUF  
Unu volumo 14x19 cm., 136-paĝa. . . . . 5 »
- Urso, En montoj**, de H. SENTIS.  
Unu volumo in-8, 84-paĝa. . . . . 2 50
- Vojaĝo interne de mia ĉambro**, de MAISTRE, el franca lingvo tradukis SAM. MEYER.  
Unu volumo in-16, 58-paĝa. . . . . 2 50
- La supraj prezoj povas varii, nur tiuj anoncitaj en la **Plena Katalogo de la Esperantista Centra Librejo**, estas ĉiam oficialaj.

Oni aldonu la sendokostojn al la supre anoncitaj prezoj.



*Pri la*

## **" Esperantista Centra Librejo "**

*Société anon. à cap. et pers. variables. R. C. Seine 40.422.*

**51, rue de Clichy, PARIS (9<sup>e</sup>).**

### **FONDO KAJ CELO**

*Multaj Esperantaj libroj, el kiuj preskaŭ ĉiuj verkoj de nia Majstro D<sup>ro</sup> L. L. Zamenhof, estis eldonitaj de la pariza Librejo Hachette, kiu dum 1919 vendis ilian plenan stokon, kun la eldonrajtoj, al la Esperantista Centra Librejo, por ke ĉi tiu librejo daŭrigu ilian disvendadon kaj publikigadon por la plej bona profito de Esperanto.*

*Tiu multvalora stoko konsistas, krom la verkoj de nia Majstro kaj plej ŝatataj kaj uzataj lernolibroj por Francoj, el riĉega kolekto da literaturaj verkoj interesantaj la Esperantistojn de ĉiuj nacioj.*

*La Esperantista Centra Librejo, kiu ilin eldonas nun, estas anonima societo kun varieblaj kapitalo kaj membraro. Ĝi akceptas kiel anojn nur Esperantistojn el iuj ajn landoj, kaj priokupiĝas ĉefe pri la sukceso de Esperanto, disdonante al sia helpantoj nur honestajn profitojn.*

*Esperantistoj, helpu ĝin! Ĝi akceptos ĉiam, kun multe da dankoj, la adeptojn aŭ aprobantojn, kiuj bonvolos doni al ĝi, per aĉeto de kelkaj akcioj (dek minimume), sian bonkoran helpon.*

*La prezo de la akcioj estas fiksita nur po Fr. 25. Oni petu tiucele, aligilon kaj statuton.*

*Katalogo kaj Aligilo estas sendatj senpage.*











BUCHBINDEREI  
**LEOPOLD SCHREFEL**

Ges. m. b. H.

1220 WIEN, HOSNEDLG. 9

TEL. 23 75 29